

## **Deus mytsotyspykwaha Suãõ bo nitsaso**

Suãõ Sesus zinymyrykyta nitsaikbata, sakyriukrēnikitsa hurukwy eze niapykyryk. Itsikzikdihī Patamos inarokota anaeze niapykyryk. Deus aiba eze hawa mynakara Suãõ bo ziwatawy. Iwaze ana zinyze hi ziwatahaka. Deus Suãõ ziapewywy iwatsahi katsa kino niwatihī tanymyryky.

<sup>1</sup> Hawa ha ty Deus Sesus Kiristu bo nitsaso. Aibani hawa maha humo kino Sesus Kiristu bo nitsaso. Tapara mybarawy ezektsa batu siwabyhy. Iwaze hi Sesus Kiristu ana harere humo hi tatsumuēhītsa pe niy. Iwaze bijoikpe iknykta Deus tsumuēhītsa, Suãõ bo izipeha, atahi iharere ibo nitsasoko. Bijoiḱpe iknykta Deus tsumuēhītsa Suãõ bo itsotyspykwaha ziny.

<sup>2</sup> Nanabyi zinyky, nanabyi ziwabyky anahi papeu humo Suãõ ziwatahaka.

– Sesus nikaranaha ty ana hi Deus harere baba – niy.

<sup>3</sup> – Atakta papeu iwatahaha ty myzubaha bo opykani motsasoko tsakurēta hỹ. Asaktsa ipapeu iwatahaha ty piwabynahaze sakurētsa hỹ. Ataharere bo hỹ maha zeka sakurētsa. Aiba eze zuba iwatahaha atsawatu my. Iwa – niy.

*Sesus tuktsa mynauzuzukbanahaze Deus harere piwabynaha sibõ Deus soho piwatahaka.*

<sup>4</sup>Utakta Suão. Asia ezektsa sete sihudikhudikwy bo piwatahaka. Sesus tuktsa mynauzuzukbanahaze iharere piwabynaha ahabo piwatahaka. Ahatsyhyryze Deus bo ikpamykysokoze ipe iky:

— O Deus myzo ikia koikny baktatu aibani zuba tsimyziksizo ahyrytsa bo. Tysipokzitsiziuku iwatsahi batu paikpa mytsaty mykaranaha ahumo sispirikporẽtsa moziknaha. Sete hyrikosotsa niwatihi Deus dyhywy iokeryk maha ikiahatsa niwatihi astsatu Deus hyrytsa bo tsimahaktsa! — my. Iwa my.

<sup>5</sup>Sesus Kiristu niwatihi! Atahi pahapokzitsiziuku, ihumo ahaspirikporẽtsa tsimoziknaha. Atakta wasani zinybata tu ana kino motsasoko. Atahi tapara inahyrizikpota atatuzo, ba zikyrikosokdazo. Atahi abazubata. Utsa pehakatsa iharere bo zuba hyĩ mykaranaha.

Atahi myhumo tsimypokzitsiukrẽta. Atahi mysapyzekenihyrikosokda, mysapyzekenytaspubaba zipuku. Ihyrikosokdawy humo mysapybyriwy Deus nimyokzohik nispiriktsokda abaka mysapyrẽtsa tsimoziknaha iwaze isapybara ty ka abaka awatutaha.

<sup>6</sup>Kiristu hi:

— Ikiahatsaktsa Deus kazo tsipitsumuẽhĩnaha, asa watsa Deus wahoro zubata eze ziknapamykysonahatsa. Ikiahatsa Deus tyryktsa tsimaha iwatahi pahapehaka hỹ, ikiahatsa ituk tsipitsumuẽhĩnaha — niy. Iwatsahi Sesus Kiristu pe:

— O Sesus Kiristu ikia azo bo tsimymyoktyhyk ikia zuba myhyrizikwani ba hawa tohi za-

sukninaha, ikia zuba tsamysapyrēta awahi tsimy-nakara – tsimaha. Siwatahaktsa kytsa!

<sup>7</sup> Tsimykozonaha! Sesus bijoikpe satata ikny mynasik. Myzubaha pinynaha. Ibezetsitsa kino niwatihi ibo mokozonaha. Myzubaha ibo moko-zonahaze sisukatsihikrētsa mopuziukunaha. Iwa.

<sup>8</sup> Sesus ipe niy:

– Utakta koikny baktatu. Utahi nanabyi ikzukniki ba hawa tohi ziksukninaha. Nanabyi isuknihibabyize kino niwata tu. Aiba mybarawy mopykze kino nawa tatu myziksizo – niy. Iwa hỹ.

*Suão tatsotospykwaha eze Sesus ziny.*

<sup>9</sup> Kyze uta Suão. Ikiahatsa Sesus humo ahaspirikporētsa iwatahi utakta ahaziky my. Ahatukta my ikiahatsa watsa hawa Sesus mynazihikiknaha humo zuba hyỹ mynakara. Ahawata sinini mynakara ana humo kino kapunihikrēta ikyzik, Sesus abazubatsa mysipehaze uta niwatihi ituk mysipeha. Ipokzitsiwy humo kytsa piksukyrykynaha. Iwatsahi uta tsikzikdihi Paratōs inarokota bo zikoktyhyryknaha. Kytsa Sesus harere bo hyỹ zikahabyitsa hi zikoktyhyryknaha. Sesus harere iktsasoko naha humo hi zikoktyhyryknaha. Deus harere wasaniha iktsasokonaha humo hi ziksukyrykynaha.

<sup>10</sup> Domiko eze Sesus inahyryzikpo mytsaty tsimykarannahaze Deus hyrikoso katuk mynapykyk. Deus hyrikoso katuk mopykyrykta tu ihumo hi tisopykziurēta ziwabyky. Iaksoho opykaniha kasukpe baze iwaby porawy suka waha my iwaby.

<sup>11</sup> Iaksoho kape nikara:

– Hawa ha bo tsimykozy naha bo papeu humo tsihiwatahaka. Ana papeu ty Sesus tuktsa bo tyziskarenaha, asaktsa Asia ezektsa bo my. Sesus tuktsa inazuzukbanahaze Deus harere piwaby-naha papeu iwatahaha ty sibo hi nyny tsimy. Asaktsa Sesus tuktsa Epeso ezektsa bo, Esmirina ezektsa bo. Perekamo ezektsa bo, Tiatira ezektsa bo, Saradis ezektsa bo, Piradepija ezektsa bo, Raodisija ezektsa bo iwatsa bo Asia sete tapapeu iwatahaha ty sibo tyziskarenaha – iaksoho niy.

<sup>12</sup> Kyze kasukpe bo iktsa iky, aty ja kape niy tawy iktsa iky. Iwaze sete rika wakatsa bo iktsa iky. Rikatsa suk ouro niy.

<sup>13</sup> Sitazahara eze maku wata niriktohoko. Tisukzezerēta ipyrysukpetsa buruk niy. Izikwoekaīwy wata ouro ty hi. Tapaopuke buruk haī niy.

<sup>14</sup> Tsiharadibarazarēta mazori hyrity waha. Nebe waha. Ihyriziktsa eze izo inapok naha iwaze niapykyryk.

<sup>15</sup> Ipyrytsa simiokbyitsa barōse niy tapara izo bo pioktsoknahaze tsikakarēta ky wa. Iaksoho ihiridawy ykpyri waha.

<sup>16</sup> Tapanuryk taba tatsipyk eze sete byrisoiktsa nisibykyk. Sokorotsapu wata isake buruk izoik niy. Petok zohota. Iok humo haramwe tokbaha niyzik tawa niukuru.

<sup>17</sup> Ibo ikozoze, iokeryk iknaraha, ikumuza tawata ikyzik. Iwaze tapanuryk taba tatsyhyrype ty kahumo paik niytahi:

– Apyby byihu ja! Utakta koikny baktatu my. Nanabyi isuknihabyize nawa tatu. Kawahi nawa tatu.

<sup>18</sup> Tapara ikumuzaspyk abaka kawahi hawa tohi kasuknihukbyita mynapykyryk. Mybarawy ezektsa mohyrikosokdanahaze kahumo isapyha eze mopykyryknaha, isapy ykarawy bo maha, kahumo ahabo mysipehaka.

<sup>19</sup> Iwaze amy tsipinynaha ana hi tsiwatahakta! Kyze hawaha abo motsaso. Tsizubarēna abo piwatawy ana hi tsiwatahakta!

<sup>20</sup> Hawa ha ty tsihokdaharēnaha zeka abo motsasoziuku. Kapanuryktabatsaktsa sete byrisoiktsa maha. Sete rikatsa, Sesus tuktsa watsa maha. Ana bo hi iktsa tsikyze hawa ha ty tsihokdaharēna zeka abo piwatawy. Ana humo kino pahyrinymyry. Rikatsa Sesus tuktsa watsa maha. Asaktsa siuzuzukwy waha kaharere piwabynaha asahi sete hudikhudikwytsa Asia eze tu maha. Byrisoiktsa sete bijoikpe iknyktsa Deus tsumuēhītsa watsa maha. Asaktsa Sesus tuktsa nisipokzitsiziukunaha – niy. Iwa atakta kasukpe baze nipamykysoko atahi Sesus nikara. Kabo nitsasoko hỹ.

## 2

*Deus soho Sesus tuktsa bo asaktsa Epeso eze mynakykpyknaha.*

<sup>1</sup> Sesus hi:

– Uta tsiwataha Sesus tuktsa Epeso ezektsa myspirikpokotsa bo tsimy. Ipe tsimy:

“Uta hi Sesus byrisoiktsa ty kapanuryk taba sete ahatsa ty paik ikykarata”. Sete rikatsa suk tazahara buruk pitabaka. Rikatsa suk eze ouro ty suknihitsa.

<sup>2</sup> Utakta kapehawy ipe my:

“Utakta ahanyba hỹ. Hawa tarabajaziu tsikykaranaha humo botu iktsa icy. Hawa tsimyzurukunaha humo ana kino ahanyba. Kahumo sinini tsikykaranhaze ahapunihkrẽtsa tsikyziknaha. Kytsa simysapybyitsa nikaranaha batu ahakparawy. Asaktsa ahabo zumunahaze tihi katsaktsa Deus wasaniha makzohotsa zispihikbatakanaha. Simyspihikbatanikitsa soho ikiahatsa sakzohotsa ja tsikaha. Siharere humo batu ahaspirikpo asaktsa zahaspihikbatakana-hatsa iwatsahi ahamytsatyhaĩrẽtsa.

<sup>3</sup> Kytsa kaharere bo yhỹ ahabyitsa mykaranaha sispirikpobyitsa tu pahasukyrykynahaze ikiahatsa ahakubyrisorokrẽtsa ziknakaranaha. Sihumo batu ahasukatsihik kahumo sinini tsikykaranaha.

<sup>4</sup> Iwa tsikykaranaha. Iwatsa tu kahumo tsikaeni zuba ahamypokzitsi anasoho humo mopamykysoko. Tapara kahumo tsimyspirikpon-ahaze kahumo ahamypokzitsirẽtsa. Abaka batu kapokzi tsikaeni zuba ahamypokzitsi. Batu wasani zikaha.

<sup>5</sup> Hawa ahasopyk mytsatytaha! Hawa tsipiksapybyrikinaha awatutaha! Hawa tapara kahumo tsikykaranaha atsawatuzoktaha! Ahasopyk ty tymoewy byizeka ahabo mozumuze aharika isapyrẽnikia piakse. Utsa rika ahasapyekze piakse. Ikiahatsa kasohotsitsabyitsa tsimoziknaha, utsa kytsa mysiwatawy asaktsa kasohotsitsa moziknaha ahasapyekze piaksenaha.

<sup>6</sup> Ikiahatsa Nikorai harere batu ahakparawy uta niwatihi iharere batu kakparawy. Asaktsa Niko-

rai tuktsa hawa ty mykaranaha batu ahakparawy tsimaha, uta niwatihi hawa ty mykaranaha batu kakparawy.

<sup>7</sup> Aty Deus hyrikoso harere piwaby tsihikik zeka atakta piwabytokto. Hawa ha ty Deus hyrikoso Sesus tuktsa bo maha piwabytoktonaha! Asaktsa kaharere bo hyŷ mynakaranaha. Kahyrikoso humo sipunihikrētsa moziknaha wihara ty sibo nyny my. Hwi Deus ziparikik tasapy eze tu tawahi ba iharaparahuk. Ana wihara humo, Deus tuk tsimynapykyryknaha. Aty wihara pezuk zeka ba zikara. Anawahi katuk ahawahi tsimynapykyryknaha isapyrēnikia ty ahabo nyny my” – niy. Atakta kasukpe baze niy atahi:

– Kaharere tsiwataha – kape niy.

Iwa kapehawy Epeso ezektsa myspirikpokotsa bo my niy.

*Deus soho Sesus tuktsa bo asaktsa Esmirina eze mynakykpykyknaha.*

<sup>8</sup> Sesus hi:

– Uta kasoho tsiwataha Sesus tuktsa Esmirina ezektsa myspirikpokotsa bo tsimy. Uta kasoho sibo uzuzukukwy eze kaharere piwabykynaha, myspirikpokotsa ipe tsimy:

“Utakta taparakta koikny bakta tu my. Nanabyi isuknihibabyize nawa tatu my. Bykyze mybarawy mopykze nawa tatu my. Uta zikbezepyknaha abaka kawahi kaspitu mynapykyryk. Ahabo kasoho ty my.

<sup>9</sup> Ahasoho inyba hŷ. Hawa sinini tsikykaranaha ana humo hi kahyrinomyrēta. Ahanamybyitsa tsimaha, kaokze kahanamyrētsa tsimaha, wasani tsimaha iwatahi isapyrēnikia ty ahabo

nyny mykara. Asaktsa ahape katsaktsa Sudeutsa tsimaha mybarapetu mykaranaha Kiristu humo siharerewabymybarëtsa, ahahumo kino niwatihi siharerewabymybarëtsa maha. Satanas harere bo zuba yhÿ mynakaranaha. Kiristu harere bo batu yhÿ zikaha.

<sup>10</sup> Sinini tsimaha zeka ahapybybyihu ja! Hyrikoso sapybara pehakatsa Satanas sakyriukrënikitsa hurukwy bo pahaoktyhyryk iwa my zeka amy ty sa batu mysapy tsimaha ana hi mozihikik. Sinini tsimaha. Iwatsa tu ahatuktsa mysibanaha zeka kaharere bo hyÿ tsimyanaranaha iwatsahi tsimyspirikpotohinaha! Utakta isapyrënikia ty ahabo nyny my ihuak ty my. Ahawahi katuk tsimynapykyryknaha. Iwa kasoho Esmirina ezektsa myspirikpokotsa bo my” – niy.

<sup>11</sup> Aty Deus hyrikoso harere piwaby tsihikik zeka atakta piwabytokto. Hawa ha ty Deus hyrikoso Sesus tuktsa bo maha tsiwabytoktonaha! Asaktsa kaharere bo hyÿ mynakaranaha mokbabanahaze ba iwatsatu mynahyryzikponaha iwazeka ba zikhyrikosokdanaha. Kytsa abazubatsa mokbabanahaze asahi inahyryzikponawa tsatu katuk mynapykyryk.

Atakta kasukpe baze niy, atahi – kaharere tsiwataha – iwa Sesus kape niy.

*Deus soho Sesus tuktsa bo asaktsa Perekamo eze mynakykpykyknaha.*

<sup>12</sup> Sesus hi:

– Kasoho tsiwataha Perekamo ezektsa bo asaktsa uzuzukukwy eze kaharere piwabynaha. Myspirikpotsa pe tsimy:



“Utakta sokorotsapu isake buruk myzoikeze tawata. Petok zohota. Utakta kasoho ty ahape my.

<sup>13</sup> Haneze tsimypykyryknaha anaeze kahyrinymyrēta. Ahaotuktsa pauktsitsa Satanas tyryktsa maha iharere bo yh̄y mykaranaha. Ikiahatsaktsa kaharere bo zuba hȳy tsimykaranaha. Siakyriukrēnikitsa Satanas harere bo yh̄y nikaranaha asaktsa Ātipas zibeze atahi kasoho nitsasoko. Iwatsa tu zibezelahaze ahahudikhudikwy eze ikiahatsa kahumo ahaspirikporētsa.

<sup>14</sup> Wastuhu ahatuk Barão spirikpowy humo yh̄y maha. Iwatahi kaokze ka ikiahatsa batu ahamysapy tsimaha. Ahasoho humo pahabetsak. Barão imysapybara ty Barak zispirikpo. Iharere humo Isareu tsekokatsa ziknamysapybyikinaha. Ispe niy:

‘Sizoho ty deusbyita bo nyny niaha iwaze tsipiboronaha zeka wasani my. Utsa okeza tsimysihuahuanaha zeka wasani my. Utsa kytsa bo tsimysimyinaha zeka wasani my’ niy. Ana harere humo Isareu ezektsa nisimiwy ihumo batu imysapy nikaranaha.

<sup>15</sup> Utsa ahatuk kino Nikorai harere bo yh̄y mykaranaha.

<sup>16</sup> Imysapybara ty ka tymoewytaha! Ahamysapybyiri ty arek ahabyi zeka ahabo mozumuze pahazuwy. Kasokorotsapu zeze kasake buruk ta humo pahasininiwy. Iwa kasoho Perekamo ezektsa myspirikpokotsa bo my” – niy.

<sup>17</sup> Aty Deus hyrikoso harere piwaby tsihikik zeka tsiwabytoktokta! Deus hyrikoso iwa h̄y ahas-

pioekeke zeka wabytaha. Sesus tuktsa uzuzukwy myspirikpokotsa pe niy.

Asaktsa kaharere bo hyĩ mynakaranaha sibo atsikara ty bijoikpe iknykyty nyny my. Atsikara bo ba zik kozonaha ana hi sidisahawy mozik. Haraharezatatsa ty estuba estubaha zuba nyny my. Haraharezata humo inaro ezytyk piwatahaka. Batu aty tohi inaro pinymyryky. Ata zuba haraharezata ty ibo nyny my atahi tanaro pinymyry.

Atakta kasukpe baze niy, atahi – kaharere tsiwataha – iwa Sesus kape niy.

*Deus soho Sesus tuktsa bo asaktsa Tiatira eze mynakykpyknaha.*

<sup>18</sup> Sesus hi:

– Kasoho tsiwataha Tiatira ezektsa bo asaktsa uzuzukukwy eze kaharere piwabynaha. Myspirikpotsa pe tsimy:

“Utakta Deus tse babata. Kahyriziktsa izo watsa. Kapyrytsa simiokbyitsa watsa tapara izo bo piochtsoknahaze tsikakarēta ky wa. Utakta hi kasoho ahape my.

<sup>19</sup> Ahasoho humo botu ahanyba. Wasani tsimykaranaha. Kaharere humo tsimyspirikpokonaha. Hawa ustsahumo tarabaziu tsimykaranaha, tynasitsumuēhiekiknaha tyharape pokzitsikinaha ana kino iny. Kahumo sinini tsikykaranaha. Abaka amy ty wasani my puētsik tsimykaranaha.

<sup>20</sup> Iwatsa tu aba estuba ahatuk imoewyhybara. Ana humo hi mopamykysoko. Sesebeu hi mykara: ‘Ikza Deus harere motsasoko. Ustatsa tsiipyryryk zeka wasani my. Utsa kytsa

tsimysimiwy zeka wasani my. Deusbyitsa izoho ahabo nyny myze tsipiboro zeka wasani my' iwa motsasoko. Imyspihikbatanikitatsa tu mybarapetu mykara. Atatsa harere humo katsumuēhĩtsa nimyikinaha iwatsahi simysapybyitsa mykaranaha. Ikiahatsa ja. Atatsa humo batu tsinaha ahaokze ka atatsa harere wasani my iwatsahi ikiahatsa atatsa pe 'Nabo pãoty' batuha.

<sup>21</sup> Atatsa humo kakubyrisorokrēta. Tozeka ja imysapybyitatsa mynakara zeka pimoewy iky. Iwatatsa tu tamysapybyrity batu tymoewy.

<sup>22</sup> Iwatahi atatsa wanu sinini ykarawy bo mopa-pykik. Anaeze sinini mykara ituktsa kino niwatihi sinini mykaranaha. Simysapybyitsa arek ahabyi zeka mysininiwy" – my.

<sup>23</sup> Asaktsa iharere siakparawy asahi:

– O atatsa myspirikpowy wasani my, atatsa harere bo yhỹ tsimaha maha. Asaktsa mysipykik. Kyze kytsa Sesus harere siakparawy mybarawy ezektsa hawa mytsaty mykaranaha Deus pinyba ana humo hi sihyrinymyrētsa. Mybarawy ezektsa hawa myzehikiknaha Deus pinyba ana humo kino sihyrinymyrētsa. Hawa kytsa mozurukunaha mybarawy eze tuze Deus mywatu myhuak ty nyny my.

<sup>24</sup> Utsa Tiatira ezektsa atatsa myspirikpowy humo batu hỹ zikaha. Atatsa hi kytsa mysimiwyky. Satanas harere baba hi myzihik niy. Iwaze kasoho ahabo meky watu, iwaze amy ty botu iktsaso yhỹ tsimaha.

<sup>25</sup> Kahumo tsimyziperykynahaze amy botu kasoho humo tsinymyrynaha ana humo kino tsima-

haktsa! Ahabo myziksizo naha tsipiperykynaha kaharere bo zuba hỹ tsimykaranaha.

<sup>26-28</sup> Tapara kazo kape niy:

“Ikia abazubatsa kytsa tysiperykykta tysipokzitsiuziukukta. Aparakbaha nanabyitaba pehatsa tsimozik” niy. Anaharere katuktsa bo my. Asahi simyharerewabybarëtsa sispirikpobyitsa tu siharere bo yh̃ maha. Katuktsa mysiperykynahatsa kino niwatihi. Asaktsa kaharere humo batu h̃ maha hawa katsa morosuk natokze tawata asahi siharere bo hỹ maha. Ma zik ahabyizeka Deus mysitotokbaikze ky wa. Deus harere bo yh̃ maha mysipehanaha. Iwa ispe my katukytsa.

Asaktsa kahumo piperykynahaze katsyhyryze pitsumuëhik̃naha, kaharere humo zuba hỹ mynakaranaha. Byrisoik ty mynakyukze tawata sibo nyny my. Uta Kiristu byrisoik wata my. Sibo kaharere bo hỹ mynakaranaha niy. Iwa kasoho Tiatira ezektsa myspirikpokotsa pe my – niy.

<sup>29</sup> Aty Deus hyrikoso harere piwaby tsihikik zeka tsipiwabytoktota. Deus hyrikoso iwa h̃ ahaspiokeketsa zeka katuktsa uzuzukwy myspirikpokotsa pe niy wabytoktotaha!

Atakta kasukpe baze niy atahi – kaharere tsiwataha – iwa Sesus kape niy.

### 3

*Deus soho Sesus tuktsa bo asaktsa Saradis eze mynakykpykyknaha.*

<sup>1</sup> Sesus hi:

– Kasoho tsiwataha Sesus tuktsa Saradis ezektsa myspirikpokotsa bo tsimy. Kasoho

sibo uzuzukukwy kaharere piwabynaha. Myspirikpotsa pe:

“Utakta Deus hyrikosotsa sete ahatsa. Byrisoiktsa ty kino sete ahatsa niwatihi my. Kasoho ahabo my. Ahasoho iwaby hỹ. Hawa tsimykaranaha anasoho iwaby. Utsa kytsa ahasoho humo ‘O Saradis ezektsa Sesus harere bo hyỹ mykaranaha iwatsahi ihumo sispirikporẽtsa hỹ’ maha. Anaka wasapehabara, kahumo ahaspirikpobyitsa tu kahyrinymyrẽta hỹ.

<sup>2</sup> Popotahaktsa! Tsinymyry naha humo kino pykyhytutaha. Kaharere humo asiba tsikspiriktsokdahanaha ana bo hi mytsatyzotahaktsa! Tsimyzurukunaha Deus okzeka batu wasani tsimaha, ihumo batu ahapokzitsi ana kino iwaby.

<sup>3</sup> Hawa ha tsinymyrykynaha ana humo hi mytsatytahaktsa! Deus wasaniha tsiwabynahaze ahakurẽtsa. Abaka ana harere humo wabyziutaha. Ahamysapybyitsa tsikykaranaha zeka tsi-moewynahaktsa! Popo ahabyizeka ahabo itsyhyryboarẽnikita mozumuze tawata. Ity pery habyyitsa ty ahabo mozumu. Itsyhyryboarẽnikita kytsa papatu mozumuze tawata. Mozumu naha humo batu ahahyrinymyry.

<sup>4</sup> Wastuhu ahatuk Saradis eze tu simysapyrẽtsa. Kazikwy humo mekywa tu moziknaha. Satanas harere bo batu yhỹ niaha. Asahi kytsa watsa tahasuk ezytyk ty korobyk ahatsa watsa. Asaktsa katuk mynapykyryknaha, sisukbarazarẽtsa ezytyk katuk mynapykyryknaha. Deus okze ka ‘ikiahatsa ahamysapyrẽtsa tsimaha.’ Iwa katuk

tahawahi mynapykyryknaha my. Simysapyrētsa Deus hyrikoso humo.

<sup>5</sup> Iwaze asaktsa kaharere bo hyŷ mynakaranaha sisukbarazarētsa ezytyk watsa maha. Asaktsa mekywa tu moziknaha Deus hyrikoso humo, iwatsahi ustsā kytsa bo batu ziksimiywynaha ana humo hi kytsa sisukbarazarētsa ezytyk watsa maha. Sinaro Deus papeu humo ziwataha ba zikokza. Ana papeu kytsa sizubarētsa asaktsa Deus tuk tahawahi mynapykyryknaha sinaro ziwataha. Kyze kazo bijoikpe iknyktsa sitsumuēhītsitsa niwatihi ispe my: ‘Iktsa tsimahaktsa! Asaktsa kahyrytsa maha’ my. Iwa kasoho Saradis ezektsa myspirikpokotsa pe tsimy” – niy.

<sup>6</sup> Aty Deus hyrikoso harere piwabytsihikik zeka atakta tsiwabytoktokta. Deus hyrikoso iwa hŷ ahaspiokeke zeka wabytaha Sesus tuktsa uzuzukwy myspirikpokotsa pe niy!

Atakta kasukpe baze niy atahi – Kaharere tsiwataha – iwa Sesus kape niy.

*Deus soho Sesus tuktsa bo asaktsa Piradepija eze mynakykpykyknaha.*

<sup>7</sup> Sesus hi:

– Kasoho tsiwataha katuktsa Piradepija ezektsa mysopyktsa bo tsimy. Kasoho sibo uzuzukukwy eze kaharere piwabynaha. Myspirikpotsa pe:

“Utakta Kiristu imysapyrēnikita. Deus zipehata babata my, katsipykeze tu hokbowy hyrizik pyryrykwy my, ata hi mydiri Dawi zikziperykya. Hokbowy ty zoksapare my zeka ba aty tohi hokbo

ziky. Hokbowy ty my zeka ba aty tohi zoksapare ziky. Uta zuba my. Kasoho ty ahape my.

<sup>8</sup> Ahasoho iwaby hỹ. Hawa tsimykaranaha iwaby. Ahapunihikrẽtsa tsikaeni zuba kaharere humo hyỹ tsimykaranaha. Kasoho humo ba kaharere warihuk. Abaka uta hokbowy ty ahaokeryk zoksapare my pany tynapupunaha! Uta zuba hokbowy ty zoksapare, ba aty tohi hokbo zihokbo.

<sup>9</sup> Wabytaha! Asaktsa Satanas hyrikoso sapybara pehakatsa. Asa hi: ‘Katsaktsa Sudeutsa’ maha. Mymyspihikbatakanaha. Wastuhu situk ahabo mozumunahaze ahape: ‘Ikiahatsa wasani’ maha. Tsimyzumubanahaze asaktsa niwatihi Deus harere piwabynaha. Asa hi: ‘Sesus ahahumo tsimpokzitsiukrẽta’ maha.

<sup>10</sup> Tapara ahape iky ‘Kytsa myzahamyi-jakanahaze kahumo ahakubyrisorokrẽtsa’ iky. Sinini tsikykaranahaze ahahakubyrisorokrẽtsa tsikykaranaha. Kaharere bo hyỹ tsimykaranaha. Aiba nanabyitaba mybarawy ezektsa bo mysininiwynahaze iwa mysiakpynaha ikiahatsaktsa ba. Kazikwy humo kytsa ahahumo batu zikaha.

<sup>11</sup> Atsoko ahabo myziksizo. Kaharere bo hyỹ tsimykaranaha zeka iwaze kahumo ahaspirikporẽtsa ahahuak ty nyny my. Ana humo hi pykyhytutaha iwaze ahahuak usts ba ziaksenaha. Kahumo tsimyspirikpotohinaha!

<sup>12</sup> Kaharere humo hyỹ mynakaranahatsaktsa sipunihikrẽtsa moziknaha. Asahi iharakurukwy wata atahi Deus wahoro zubata ezekta. Ataharakurukwy hi tawahi mynapykyryk. Iwata asaktsa Sesus humo sispirikporẽtsa Deus

tuk tahawahi mynapykyryknaha. Ba hawa tohi zikaha. Deus naro sihumo piwataha, Deus hudikhudikwy tanaro kino sihumo piwataha. Ihudikhudikwy Serusarēhe ezytyk, tahudikhudikwy Deus bijoikpe ikny mynazepik. Iwaze kanaro ezytyk sihumo piwataha. Iwa kasoho Piradepija ezektsa myspirikpokotsa pe tsimy” – niy.

<sup>13</sup> Aty Deus hyrikoso harere piwaby tsihikik zeka tsipiwabytoktokta. Deus hyrikoso iwa hỹ ahaspiokeketsa zeka uzuzukukwy perytsitsa pe niy katuktsa bo wabytoktonaha!

Atakta kasukpe baze niy atahi – Kaharere tsiwataha – iwa Sesus kape niy.

*Deus soho Sesus tuktsa bo asaktsa Raodisija eze mynakykpykyknaha.*

<sup>14</sup> Sesus hi:

– Kasoho tsiwataha katuktsa Raodisija ezektsa myspirikpokotsa bo tsimy. Kasoho sibo uzuzukukwy eze kaharere piwabynaha. Myspirikpotsa pe tsimy:

“Uta kamysapyrēta. Amy motsasoko naha atsa tyty mykara. Kahyrizikporēnikita. Deus nanabyi zuknihyize uta kino nawa tatu my. Uta Deus tuk mybarawy ikzukni. Kasoho ahape my.

<sup>15-16</sup> Ahasoho iwaby hỹ. Hawa tsinakaranaha iwaby.

Hawa tsimyzurukunaha humo kahyrinymyrēta. Ikiahatsa pihik itsikzoha barawaha tsimaha. Ikiahatsa pihik itsikwarik barawaha watsa tsimaha zeka wasani. Ikiahatsa kahumo batu ahamypokzitsi, kahumo tsikaeni zuba ahakparawy. Kahumo tsipikpokzitsikinaha



mozihikik. Ikiahatsa kahumo ahakparawy byizeka anahi jokboha pihik itsikwarika waha. Ikiahatsa kahumo ahakparawy tsikaeni zuba batu imysapy my, iwatahi pihik dē zuba maha wa tsimaha. Iwatahi kapyspykrēta asiba ikzizohok iwa ahabo mytsaty mykara.

<sup>17</sup> Ikiahatsa ahape tu tsimynakaranaha:

‘O katsakta mynamyrētsa. Ba amy tohi zikzihikiknaha’ mytsaty ahabyitsa. Kaokzeka ahapokzitsibyitsa watsa. Ahanamyrētsa ja tsimynakaranaha ahanamybyikitsa watsa tsimaha. Tsihyrizikubyitsa watsa. Ahasukbyitsa watsa tsimaha.

<sup>18</sup> Kaharere bo wabyziutaha! Kaouro baba botu izo bo iwezokonahawa tsiptaksenaha. Iwa tsimaha zeka ahanamyrētsa watsa tsimoziknaha. Ahasukbarazarētsa kabo tsimyzapykynaha zeka iwaze batu ahasikpyby. Ahahyrikitsa sowy kabo tsimyzapykynaha zeka iwaze iktsa tsimaha. Kaharere bo hyŷ tsimaha zeka iwaze ahamysapyrētsa tsimoziknaha. Kahumo ahaspirikporētsa babatsa hi iwatsahi sinamyrētsa watsa tsimoziknaha. Ahakurētsa tsimaha.

<sup>19</sup> Asa humo kamypokzitsiarēta, amy humo imysapybara humo maha zeka mysibetsakak. Mysizuspyk iwatsahi amy ty wasani mykaranaha. Iwatsahi batu ahamyi, ahamysapybyity tsimykaranaha zeka tsimoewynaha!

<sup>20</sup> Kaharere bo wabytoktotaha! Hawa mytsaty tsimykaranaha kahumo meky watu tsimoziknaha. Ikiahatsa wahoro hyrity watsa, uta hokbowy humo toto mynakaraze. Aty kaksoho piwaby zeka hokbowy ty zoksapare my zeka iwa-

horo bo mytsuk. Anaeze mynapykyryk ituk pikdisaha. Ata kino katuk tadisaha. Iwa tsimyzurukunaha zeka ikiahatsa kawatsa tsimoziknaha iwatsahi iwa tynakaranahaktsa.

<sup>21</sup> Asa kaharere bo hyÿ mynakaranahatsaktsa ispe my: ‘Panytynaha! Kabaze dyhytyny!’ my. Siwatsa utakta Deus kazo harere bo hyÿ ikykara iwatahi ‘Pany! Kabaze dyhyty! katukytsa mysipehaka’ kape niy. Abaka kazo dyhywy bete mynapykyryk kytsa mysipehaka hÿ. Iwa kasoho Raodisija ezektsa myspirikpokotsa pe tsimy” – niy.

<sup>22</sup> Aty Deus hyrikoso piwaby tsihikik zeka atakta tsiwabytoktokta! Deus hyrikoso iwa hÿ ahaspioekeke zeka wabytaha Sesus tuktsa uzuzukukwy myspirikpokotsa pe niy!

Atakta kasukpe baze niy, atahi – kaharere tsiwataha – iwa Sesus kape niy.

## 4

*Deus hudikhudikwy bijoikpe eze sizubarÿtsa Deus bo mosakibazikiknaha ana hi iny.*

<sup>1</sup> Kyze katsotyspykwaha eze hokbowy iny. Hokbowy bijoikpe eze zoksapare ahata iny. Berekze suka wata botu iwaby ata hi iwabyzo. Kape niyzo. Atahi kape nikara:

– Pany, pakutyny! Hawa maha humo pahyrinymyry – niy.

<sup>2</sup> Atsoko Deus hyrikoso zikykse iwaze bijoikpe bo iktsa iky. Anaeze bijoikpe eze idyhywy tisapyrÿta bo iktsa iky. Aty idyhywy bete nidyhyky tabo iktsa iky.

<sup>3</sup> Atahi iok haramwe jekyrikoso harahareziktsa sipokzitsiarētsa watsa, tsikarikpukarikpukrētsa. Idyhywy haraputaba tsokma natazikto tsikakarēta anahi harahareziktsa esmerarada wata.

<sup>4</sup> Idyhywy kytsa mysipehaka nahaeze ky tisapyrēna harape baze ustsida sidyhydyhywytsa. Wite kwatero sidyhywytsa niaha. Tapara taypykyryknahatsa simyharerewabyrētsa asa hi sibete nidyhydyhykynaha. Sisukbarazarētsa. Ouro ty sitsorikihitsa.

<sup>5</sup> Idyhywy ikny hyrikosotsa bo iktsa iky. Ikaripukaripu bo iktsa iky. Siaksoho mytotoko nahaze ky wa nikaranaha. Idyhywy baze sete rikatsa napokoknaha. Asahi Deus hyrikosotsa sete maha.

<sup>6</sup> Idyhywy okeryk zarape waha moknywy bo iktsa tsimykarannahaze ky wa ana waha bo ikozo, iharaharezik kiristau wata.

Kyze idyhywy okeryk nanabyitaba siraratsa sispitutsa maha. Sihorokykyktsa babatsa. Sihyryziktsazubarētsa, sinury wa tu sihyryziktsa. Iharaze isukpe baze iwa.

<sup>7</sup> Estubaka irara parini wata. Usta irara pikuza wata. Usta irara makuok wata. Usta irara wohorek hyritywata nitsatsaka tawata niy.

<sup>8</sup> Sizubarētsa sisarapaikitsa niaha. Usta tsyhyry humo ziakyri naha wa sisarapaikitsa niaha. Estuba estuba zuba ses sisarapaikitsa niaha. Nataba harakykbyi isarapaik, usta tabaha harakykbyihi isarapaik iwa hÿ. Sisarapaiktsa eze ihyryziktsa sizubarētsa, nanabyitaba sihyryziktsa,

sisarapaikitsa upukezi sihyriziktsa niaha sisarapaiksupetaba hyriziktsa kino niwatihi sihyriziktsa niaha. Siraratsa sispitutsa nisakibazikiknaha pyk ahabyitsa nikaranaha. Okoroze, unata aha eze nisakibazikiknaha. Asa hi nikaranaha:

— O Deus ikia tsamypokzitsiukrêta  
ikiakta azikwyrênikita

ba hawa tohi zikasukninaha.

Tsamysapyrêta. Asopykziurênikita. Nanabyi zuknihyize ikia tu.

Aba kino niwatihi ikia tu nikaranaha.

Tsimyziksizo hÿ

iwa nisakibazikiknaha.

<sup>9</sup> — Ikia zuba tsamysapyrêta tsinakara. Ikia zuba wasani tsimynakara. Ikia zuba ahyrizikporênikita tsinamypokzitsiki asopyksapyrênikita hÿ iwatsahi mykurêtsa tsimykaranaha — iwa nisakibazikiknaha. Iwa atakta idyhywy eze kytsa mysipehaka ibo nisakibazikiknaha. Atahi koikny baktatu tawahi atatu my.

<sup>10</sup> Nisakibazikiknahaze tapara taypykyryknahatsa simyharerewabybarênikitsa wîte kwatero ahatsa wytyk bo inatsubaiknaha ipe niaha atahi idyhywy bete nidyhyky. Atakta imysapyrênikita ihumo mynatsunaha. Atahi Deus mybarawytsa siraratsa nisisukni iwatsahi mynatsunaha. Atahi koikny baktatu tawahi nawa tatu mynapykyryk ipe maha:

— Ikia zuba amyharerewabyziurênikita — maha. Tahatsorik ty iokeryk zizozokonaha. Asahi:

<sup>11</sup> — O ikia zuba mybaratsa, ikia myhumo amy-pokzitsiukrêta.

Ikia Deus babata, mypehakatsa.

Ikia mybarawy tsikzukni, nanabyi tsikzukni  
 aharere humo tsizubarēna anatu maha.  
 Myzubarētsa tsikmysukni. Iwatsahi  
 abo tsimysakibazikiknaha ikia zuba  
 tsamysapyrēta ba zimyi,  
 ikia zuba azikwyrēnikita ba hawa tohi zasukni-  
 naha, ikia zuba tsamyharerewabyrēta.  
 Asopykziurēnikita, amyhyrizikporēnikita awa  
 suknihabiyita iwa abo tsimysakibazikikik-  
 naha – niaha.  
 Atahi idyhywy bete nidyhyky ibo hi nisakibazikik-  
 naha hỹ.

## 5

*Papeu iwaze hozipyrykza hyrity wata iwaha iny.*

<sup>1</sup> Kyze papeu zikwaraka turārã ty pirikwyhyha  
 bo iktsa iky. Anapapeu atakta tadyhywy bete  
 nidyhyky tapanuryk taba zibykyk. Nataba  
 natabaha papeu humo iwatahaha. Ipirikwyhyha  
 hi sete ahatsa niaha.

<sup>2</sup> Iwaze bijoikpe iknykta Deus tsumuēhĩtsa  
 tsipunihikrēta iny. Atahi tsiaksohopykrēta nikara:  
 – Batu aty tohi imysapyta iwaze ipirikwyhyha  
 ba zikbabari iwa zeka papeu ty ba hyrikok zeky –  
 niy.

<sup>3</sup> Ba aty tohi bijoik pe eze. Mybarawy eze kino  
 ba aty tohi. Mybarawy opuke bo kino ba aty  
 tohi. Ba aty tohi ipirikwyhyha ty ba hyrikok ziky,  
 iwatahi papeu bo batu iktsa ziky.

<sup>4</sup> Iwatahi utakta ikpuziuku. Ba aty tohi ipirik-  
 wyhyha ba ziksibabari iwaze papeu bo iktsa my.  
 Ba aty tohi imysapyta humo ipirikwyhyha ba zik-  
 bari zeky ahabyi tahi ikpuziuku.

<sup>5</sup> Kyze estuba tapara taypykta tsimyharere-wabyziurēta kape niy:

— Asukabyity! Iktsa tykta! — estuba zuba Suda iknykta. Mydiri Dawi tsekokatsa atahi ipirik-wyhyha mysibabaribaik iwaze hi papeu humo iwatahaha pinyba. Atakta abazubata tsipuni-hikrēta parini wata. Atahi isokpykziurēnikita. Sathanas iharere bo hyỹ mykara.

<sup>6</sup> Iwaze hozipyrykza tsibik iny. Idyhywytsa tazahara eze niriktohoko. Siraratsa sihokykyktsa babatsa, taparaktsa simyharerewabyrētsa iwatsa hozipyrykza ispokteze niapykyryk. Anaka hozipyrykza bezewy aba ispituzo. Iharanitsa sete ahatsa. Ihyriziktsa kino sete ahatsa. Asahi Deus hyrikoso nanabyitaba mybarawy ezektsa bo ahatsa sete nisipehaka.

<sup>7</sup> Hozipyrykza modyhykyta bo niparak papeu ipanuryk taba niapykyryk naha ty okok niy.

<sup>8</sup> Napapeu zibykze siraratsa sapetoktsa sapetoktsa hozipyrykza okeryk taekaratsa humo puruk puruk niaha. Situk taparaktsa wīte kwaterotsa hozipyrykza okeryk kino niwatihi okmymy nikaranaha. Asaktsa ipamykyzuwytsa humo. Sioporosuktsa ouro zuba ha atsa eze jokmorēnikia niaha. Deus hyrytsa ibo mopamykysonahaze jokmorēnikia waha ibo my. Hawa jokmorēnikia mybo waok myze mykparawy Deus kino niwatihi. Katsa Deus bo tsimypamykysokonahaze Deus iakparawy.

<sup>9</sup> Siraratsa sispitutsa, taparaktsa sizubarētsa iwatsa tasakebazik ty, ezytyk ty nisakibazikik-naha:

– Ikia zuba papeu tsiptakse. Ikia zuba pirikwyhyha tsimysibari.

Ikia zuba abazubata tsapunihihrēta. Kytsa zabezenaha humo yh̄y zuba tsiky.

Mysapyzeken iharapatawyhyta humo tsikyrikosokdaze kytsa sizubarētsa Deus bo tsiksioktyhyryk.

Kytsa simysapybyitsa nikaranahatsa Deus ahumo mysiozkohik.

Tsikyrikosokda naha humo sasabyitsa mybarawy ezektsa bo,

meky mekywatu sihareretsa sasabyitsa bipyritsa

nanabyi sihudikhudikwytsa iwatsa Deus bo tsiksioktyhyryk.

Ana humo hi papeu ipirikwyhyha tsimysibabari.

<sup>10</sup> Deus sizubarētsa humo tsimypokzitsiarēta mozik,

tatyryktsa tuk mypehakatsa moziknaha, aharere humo.

Aharere bo yh̄y mykaranaha iwatsahi sispirikporētsa moziknaha.

Mybarawy eze maha siperytsitsa moziknaha.

Asaktsa Deus wahoro zubata eze ziknapamykysonahatsa siwatsa moziknaha,

Deus pitsumuēh̄naha, itsumuēh̄tsitsa moziknaha Deus tyryktsa babatsa

iwa nisakibazikiknaha.

<sup>11</sup> Iwaze inyo. Bijoikpe iknyktsa Deus tsumuēh̄tsitsa iksiwaby, sizubarētsa. Bijoikpe iknyktsitsa abazubatsa. Kytsa humo batu sihyrinomyry ba ziksiwatawybanaha. Asaktsa idyhywy zahasazawynaha. Siraratsa sispitu

napetok napetok taparaktsa kino niwatihi  
zihasazawynaha.

<sup>12</sup> Opykania ty nisakibazikiknaha, asahi:

— O hozipyrykza tsibik tabezewyta

ikiahī azikwyrēnikita. Ikiahī anamynikita.

Ikiahī ahyrinymyryta babata. Ikia hi tsapuni-  
hikrēta.

Ikiahī tsaharereziurēta myzubatsa ahumo ik-  
tsazuba mynakaranaha.

Ikiahī tsahyryzikporēta amysapyrēnikita. Ikiahī  
tsasopykziurēta.

Ikia bo zuba tsimysakibazikiknaha!  
nisakibazikiknaha.

<sup>13</sup> Kyze abazubatsa ibo nisakibazikiknaha, ana  
hi iwabyky. Bijoikpe ezektsa, mybarawy ezektsa,  
asaktsa mypuke ezektsa, buburuzuba iknyktsa  
iwatsa nanabytabaktsa ibo nisakibazikiknaha:

— Atakta tadyhywy bete modyhykyta,

hozipyrykza bo kino niwatihi tysakibazikik-  
nahaktsa!

Ikia zuba tsamysapyrēta. Ikia zuba tsamyhar-  
erewabyrēta myzubaha ahumo iktsazuba  
mynakaranaha.

Ikia zuba azikwyrēnikita. Ikia zuba tsasopykz-  
iurēta.

Iwa mywahi hozipyrykza bo tsimysakibazikik-  
naha! Deus bo tsimysakibazikiknaha!

Iwa nisakibazikiknaha.

<sup>14</sup> Siraratsa sispitutsa sihokykyktsa babatsa iwa  
tihi:

— Katsa kino niwatihi! — niaha. Iwa hỹ  
kyze taparaktsa taekaratsa humo puruk puruk  
nikaranaha. Atakta tadyhywy bete nidyhyky



hozipyrykza kino niwatihi simysapyrĕtsa sihumo taekaratsa humo puruk puruk nikaranaha.

## 6

### *Iokpyripyrihyha iksiny.*

<sup>1</sup> Iwaze hozipyrykza bo inyzo. Papeu sete iokpyripyrihyha bo niy. Tapara iokpyrikihiha iharapepewy niakbabaribaik iny. Iwaze estuba sirara ispituta:

– Pany! – niy. Iaksoho hyritsik bipyri waha nikara.

<sup>2</sup> Atsoko pikuzza tsibarazarĕta bo ikozo. Atakta isukpetara bete taparaky ty wabe ahata nidyhyky niy. Ouro ty hi itsorikihita. Atahi niparakze sizubarĕtsa paik zipykba iwatsahi iharere bo hyŷ mykaranaha.

<sup>3</sup> Iwaze atahi atakta kytsa zibezenhata hozipyrykza tsibik usta iokpyrikihiha iharapepewy niakbabaribaik. Petok niakarak. Usta sirara ispituta iwaby. Atahi:

– Pany! – niy.

<sup>4</sup> Iwaze usta pikuzza tsaririta izo waha bo ikozo. Atabete nidyhyky mykyriwy ty ibo nyny niy. Iwaze mybarawy ezektsa ata humo hi mowat-soronaha, sizubarĕtsa ihumo mowakubyrinaha. Atahi sokorotsapu tsizerĕta ty ibo nyny niy.

<sup>5</sup> Iwaze atahi atakta kytsa zibezenhata hozipyrykza tsibik usta iokpyrikihiha iharapepewy niakbabaribaik. Harakykbyi hi iokpyrikihiha niakbabari. Usta sirara ispituta iwaby. Atahi:

– Pany! – niy.

Atsoko pikuza ioktsirõrõta iny. Atabete nidyhyky, barãso ty mypewy hyritywakata tatsikpyk eze wabe ahata nidyhyky.

<sup>6</sup> Siraratsa sapetoktsa sapetoktsa nawa situk maku iaksoho wata iwaby. Atahi:

– Estuba mypaik suk zibykykzo tsipokzitsarëna estuba zuruze tarabaja nikara anahumo zihuak. Harakykbyihi ahostsa suk zebykykzo tsipokzitsarëna estuba zuruze tarabaja nikara anahumo zihuak. Ituta usaka ba ziktakyky! Duabohotsa tsik kino niwatihi usaka ba ziktakyky! Ihuak ty jokbohohamo humo zuba tsikaeni aty zuba zikzihuakak! – niy.

<sup>7</sup> Iwaze atahi atakta kytsa zibezenhata hozipyrykza tsibik usta iokpyrikihiha iharapepewy niakbabaribaik. Siharakyktsitsa zuba iokpyrikihiha niakbabari. Usta sirara ispitu ta iwaby:

– Pany! – niy.

<sup>8</sup> Atsoko usta pikuza tsitozoarëta bo ikozo. Atabete myhyrikosokdawy inarokota ibete nidyhyky. Iapik abazubatsa siakbatsa ykarawy ezektsa iapik niukurunaha. Atahi ibaze:

– Mybarawy ezektsa abazubatsa myharape banaha! Sapetoktsa sapetoktsa nawahatsa tsimysihobykze estuba tsipibeze myzubarëtsa tsapukte tsipibeze iwa tsimykara. Myrapa humo myokbanaha mymysapyri humo mokbanaha, siraratsa siakyriukrënikitsa humo mokbanaha iwa sizubarëtsa mysibanaha – niy.

<sup>9</sup> Iwaze atahi atakta kytsa zibezenhata hozipyrykza tsibik usta iokpyrikihiha iharapepewy niakbabaribaik mytsyhyry watsa

iokpyriwy niakbabari. Iwaze jokmorēnikia wezowy opuke bo iktsa iky. Anaeze kytsa hyrizikaratsa bo ikozo. Sakyriukrēnikitsa istyba. Asa hi Deus harere bo hyŷ nikaranahatsa ihumo nspirikponahatsa, Deus wasania ty nitsasoikiknaha iwatsahi sakyriukrēnikitsa nisibanaha Sesus humo sispirikpobyitsa iwatsahi nisibanaha.

<sup>10</sup> Asahi opykani kadi nikaranaha:

— O Deus mypokzitsikitsa ikia zuba azikwyrēnikita ba hawa tohi zasukninaha. Amy wasania ty zuba tsimykara. Asopykziurēnikita. Ahyrizikporēta hawaze ja mybarawy ezektsa tsimysizuwy, nimybakanahatsa hawa eze ja tsimymytsapusare — nikaranaha.

<sup>11</sup> Iwaze siwa tu isuk tsibarazarēta ezytyk ty sibo nyny niy. Atahi:

— Ahakubyrisorokrētsaktsa. Sakyriukrēnikitsa ustsā ahatukytsa mysibanaha. Hawa zahabanaha ustsā Sesus tsumuēhītsa kino mysibanaha. Mysibanahaze ahakubyrisorokrētsaktsa — niy.

<sup>12</sup> Iwaze atahi atakta kytsa zibezēnahata hozipyrykza tsibik usta iokpyrikihiha iharapepewy niakbabaribaik. Ustsā tsyhyry humo iziakyri zuba iokpyrikihiha niakbabari. Ana niakbarize wytyk nitydydydykyk tu. Haramwe miwa niyzik panu nioktsirōrō nahawa. Byzoje ispu ty iokperirihitawa niy.

<sup>13</sup> Byrisoiktsa bijoikpe iknyktsa wytyk bo mynatsunaha. Mynatsunahaze umaha hara zopoktsa myzitsunahaze ky wa.

<sup>14</sup> Bijoikpe nihokda. Papeu ihara tukarehewaha bijoikpe taha tukare niy. Hara jotabanikia mekybotu tahasapy. Sasabyitsa itsikzikdihitsa kino niwatihi mekybotu tahasapynaha. Nanabyi mytydydykyk tu.

<sup>15</sup> Iwaze mybarawy ezektsa pehakatsitsa, sodadutsa pehakatsitsa, sinamynikitsa, sihyrinymynikitsa, sitarabaja tshikanikitsa, asaktsa tarabaja zuba mykaranahatsa okyryaro byitsa kino niwatihi abazubatsa iwa tahaukpitsĩnaha. Harahare oke bo tahaukpitsĩnaha. Hara joboni ha bo anaeze harahare puk eze tahaukpitsĩnaha.

<sup>16</sup> Hara, haraharetsa ahatsa pe niaha:

— Mybete tynatsu. Haraharetsa tynamyokpitsĩnaha. Iwaze Deus tadyhywy bete modyhykyta batu mybo iktsa ziky. Atahi kytsa zibezenahata hozipyrykza tsibik myhumo takyriki.

<sup>17</sup> Atahi myhumo takyriki, katsa sipokso mypybyrẽtsa. Iwapuruze batu aty tohi sakyriwy bo iktsa tsimaha abazubaha mopyk sipokso sakubyri zumu — nikaranaha.

## 7

### *Isareu ezektsa sizubarẽtsa iksiny.*

<sup>1</sup> Iwaze bijoikpe iknyktsa Deus tsumuẽhĩtsa sapetoktsa sapetoktsa iwatsa bo ikozo. Asahi mybarawy ipaiko eze niriktotohokonaha. Iwaze zopoktsa sihumo ba ziknabybyk naha. Zopoktsa sihumo mybarawy eze ba ziknabybyknaha. Zopoktsa sihumo hwitsa bo ba ziknabybyknaha.

Buburu zuba bo kino niwatihi zopoktsa ba ziknabybyknaha.

<sup>2</sup> Iwaze usta bijoikpe iknykta bo ikozozo. Haramwe sukewy ikny izumu. Atakta Deus humo inymyryhywyhyta tuk. Kytsa Sesus harere bo hyŷ mykaranaha ihumo sispirikporētsa mysiwatawyky ana hi:

– Atakta Deus tse maha. Atahi koikny bakta tazo tuk mynapykyryk – niy. Iwaze opykani kakaik niy sapetoktsa sapetoktsa iwa bijoikpe iknyktsa bo opykani kakaik niy. Tapara asaktsa bijoikpe iknyktsa Deus nisiakzo sihyrizikt-sokzawy bo asaktsa wytyk zimiyiwynaha. Buburu zuba bo kino niwatihi zimiyiwynaha.

<sup>3</sup> Iwaze bijoikpe iknykta ipaiko eze ta:

– Byri tahaktsa! Wytyk, hwitsa, buburu zuba iwaha tymyimybyitaha! Byritaha. Tapara Deus tsumuēhŷtsa siokpe humo tysiwatahanaha. Inymyryhywy siokpe humo. “Asaktsa Deus tse maha” tsipiwatahanaha – niy. Yhŷ niaha.

<sup>4</sup> Iwaze siokpe watahatsa kytsa nisiwatawybanaha, 144.000 iwaby. Sizubarētsa hiba. Wastuhu estuba estuba zuba aparakbaha siokpe humo nisinymyhywykynaha Isareu tsekokatsa niaha.

<sup>5-8</sup> Suda tyryktsa 12.000 siokpe humo nisiokpewatahaka. Reubē tyryktsa 12.000 siokpe humo nisiokpewatahaka. Kade tyryktsa 12.000 siokpe humo nisiokpewatahaka.

Ashere tyryktsa 12.000 siokpe humo nisiokpewatahaka. Napatari tyryktsa 12.000 siokpe humo nisiokpewatahaka. Manasa tyryktsa 12.000 siokpe humo nisiokpewatahaka.

Simeõ tyryktsa 12.000 siokpe humo nisiokpe-watahaka. Rewi tyryktsa 12.000 siokpe humo nisiokpewatahaka. Isaka tyryktsa 12.000 siokpe humo nisiokpewatahaka.

Seburõ tyryktsa 12.000 siokpe humo nisiokpe-watahaka. Sose tyryktsa 12.000 siokpe humo nisiokpewatahaka. Běsami tyryktsa 12.000 siokpe humo nisiokpewatahaka.

Asaktsa sizubarětsa siokpe humo nisiokpewatahaka asaktsa Deus hyrytsa nisiwatawy.

*Myzubaha humo ba ziksiwatawybanaha tsa bo ikozo.*

<sup>9</sup> Iwaze kytsa sizubarětsa bo ikozo. Ba ziksiwatawybanaha myzubahatsa. Wastuhu kytsa bipyritsa maha. Kytsa aparakbaha sizubarětsa. Nanabyitaba sihudikhudikwytsa. Asaktsa meky mekywaha harere tu mopamykysokonaha, kytsa sizubarětsa hozipyrykza tsibik iokeryk niapykyryknaha atakta tadyhywy bete nidyhyky. Atahi kytsa zibezenhata ibo mosakibazikiknaha. Sisukbarazarětsa nikaranaha. Tsarakzapatsa ty nisibykyknaha.

<sup>10</sup> Asaktsa opykani ka nikaranaha:

– Deus zuba mybetesatsa. Sesus hi nihyrikosokda hozipyrykza tsibik wata tazo bo mymyoktyhyrykta. Deus tadyhywy bete mynadyhyky – niaha.

<sup>11</sup> Bijoikpe iknyktsa abazubatsa dyhywy zihaszawynaha. Taparaktsa simyharere-wabyrětsa siraratsa sispitu sapetoktsa sapetoktsa iwatsa Deus okeryk niokmymyhykynaha. Asaktsa:

– Ikia zuba tsamysapyrěta – nikaranaha.

<sup>12</sup> Asaktsa:

– Iwa myhỹ. Deus hi imysapyrēnikita ibo tsimysakibazikiknahaktsa! Izikwyrēnikita ba hawa tohi zikzukninaha. Tisopykziurēta. Tisopyksapyrēta. Ihyrizikporēnikita. Imyharere-wabyrēnikita. Ipunihikrēnikita. Koikny baktatu tawahi mynapykyryk hỹ. Iwa – nikaranaha.

<sup>13</sup> Kyze estuba tapara taypykta kape niy:

– Hawa hatsa skaraba sisukbarazarētsa. Hana iknytsa sa izumunaha – niy.

<sup>14</sup> – O kapehakatsa batu kahyrinomy. Ikiya zuba tsahyrinomyrēta kabo tsimytsaso – ikiy. Atahi:

– Asaktsa kytsa sukyrytsitsa humo nisizukunaha tu. Iwatsa tu Sesus harere bo hyỹ nikaranaha ihumo sispirikporētsa nikaranaha. Atahi kytsa zibezenahata hozipyrykza tsibik atahi sisapyzekenihyrikosokda ana humo hi hyỹ nikaranaha nispirikponaha. Iwatsahi siziurētsa. Simysapybyri humo nikaranahatsa tu Deus hozipyrykza tsibik humo nisiokzohik.

<sup>15</sup> Iwatsahi Deus dyhywy baze morikto rikto-hokonaha. Okoroze unata ahaze Deus myzit-sumuēhĩkĩnaha iharere bo hyỹ mykaranaha. Batu pyk zikaha. Tahawahi ituk mynapykyryknaha. Deus hi mynasipokzitsiki, hawa ha ty mysimyi naha pokso mysipokzitsiki.

<sup>16</sup> Ihumo hi ba sirapa zikzumu. Ba sirapuruk. Haramwe humo ba zikpiakoronaha iwaze ba izohoni ziyknaha.

<sup>17</sup> Atahi Deus dyhywy bete nidyhykyta nihyrikosokda hozipyrykza tsibik atahi sispirikpotsa mozik. Sihumo tsimypokzitsiukrēta. Atahi pihik bo mysiockyhyryk ana hi

pihik pupuputsa watsa tsipikunahaze  
 ahawatu ahaspitu tsimoziknaha. Deus  
 mysihyritsiksytsykyk ba zikpuzonaha — iwa  
 hỹ.

## 8

### *Iokpyrikihiha ziharawy iny.*

<sup>1</sup> Iwaze atakta kytsa zibezenaha hozipyrykza  
 tsibik iokpyrikihiha ziharawy zuba niakbabarib-  
 aik. Utsa tsyhyry humo petok zuba siakyrikihiha  
 niakbabari. Iwaze abazubatsa bijoikpe eze tu  
 tsikaeni zuba pywa niapykyryk, meja ora eze batu  
 harere aha.

<sup>2</sup> Iwaze atahi porawy suka wata kytsa hu  
 nikaranaha bijoikpe iknyktsa bo nyny niy. Asak-  
 tsa Deus okeryk niriktotohokonaha. Porawy  
 watsa ty utsa tsyhyry humo petok zuba, sete  
 ahatsa bo bijoikpe iknyktsa bo nyny niy. Estuba  
 estuba zuba porawy ty nyny niy.

<sup>3</sup> Usta bijoikpe iknykta ouro ty ioporosukokta  
 iwaze izumu. Ata hi jokmorēnikia wezowy  
 baze niriktohoko, anaeze kytsa Deus bo  
 nipamykysokonaha. Izumuze jokmorēnikia  
 wezowysapy bo usta ipe niy:

— Jokmorēnikia tsizubarēna ty abo nyny my.  
 Deus hyrytsa ibo nipamykysoikiknaha, siharere  
 jokmorēnikia tuk tsimytsakykynaha! Aoporo suk  
 anaeze tsimytsakykynaha ana kino Deus dyhywy  
 okeryk tsi piwezoko — niy.

<sup>4</sup> Iwaze jokmorēnikia ziwezokoze Deus hyrytsa  
 harere tuk itsakykyha, nikorokonaha zatata jobo  
 nizoko. Bijoikpe iknykta humo zatata jobo Deus



bo niy. Deus hyrytsa harere zatata tuk jobo nidoko.

<sup>5</sup> Iwaze bjoikpe iknykta jokmorēnikia suk izo ty ziharek. Iwaze iwezowy bo zibykyk niy. Iwaze mybarawy bo izo inapapyk. Atsoko nitok. Nanabyitaba pare parezo nikara. Wytyk nitydydykyk tu kytsa siaksoho pokso sipybyrētsa nikaranaha.

*Porawy wakatsa eze mopamykyzukunaha.*

<sup>6</sup> Iwaze bjoikpe ezektsa sete ahatsa porawytsa nasibykyknaha tahazozikbakanaha niaha.

<sup>7</sup> Tapara estuba bjoikpe iknykta taporawy ziokehuhukuze hyritsik izo harahareziktsa iwatsa myspu hyritywaha nawōkō. Izo ispu waha niwatihi mybarawy bete nawōkō. Bjoikpe iknykta humo inawōkō. Wytyk, hwitsa towahaditsa aha tsapukte ezeka nikorobaik. Nepykbaba. Nabaze are ahabara.

<sup>8</sup> Iwaze usta bjoikpe iknykta taporawy ziokehuhuku. Aba petoktsa botu ziokehuhunaha. Iwa niahaze hara jobonita mokoroko ziktawata buburu zuba bo inaotsok. Iwaze inaharazukze tsapukte ezeka ispu waha niyzik.

<sup>9</sup> Piknutsa jokboha niakbakanaha. Tsarahatsa puizipyrykybitsa jokboha nipyknaha. Tsizubarēna nepyk.

<sup>10</sup> Iwaze usta bjoikpe ezekta taporawy ziokehuhu. Aba harakykbyihitsa botu nisiokehuhunaha. Iwaze byrisoik puētsikbyita bjoikpe iknykta wytyk bo inasik. Rika mokorobakaze tawata buburu jokboha niy, pupuputsa niwatihi jokboha nisipykwy.

<sup>11</sup> Ispianikia byrisoik naro. Byrisoik humo jokboha pihik tispiaŕēna niyzik, mybarawy ezektsa ana pihik zikukunahatsa hi ispi humo niakbakaranaha.

<sup>12</sup> Iwaze usta bijoikpe iknykta taporawy ziokehuhuku. Abaka sapetoktsa sapetoktsa ahatsa botu tahaporawytsa nisiokehuhukunaha. Iwaze wytyk hararikazowy nimyi. Haramwe pykyhy ihyrizikubyitatu. Byzoje pykyhy kino niwatihi ihyrizikubyitatu. Byrisoiktsa pykyhy kino sihyrizikubyitsatu. Iwatsahi mypubyi ahabo ba zikozonaha sihyrizikubyri humo. Okoroze unata aha taparaka miwa zuba.

<sup>13</sup> Iwaze iktsazo ikyze wohorek joboni nitsatsaka tabo iktsa iky. Nitsatsakaze opykani ka nikara:

– Mybarawy ezektsa simypokzitsiubyitsa moziknaha. Simypokzitsiubyitsa sinini mykaranaha. Bijoikpe iknyktsa harakykbyihitsa porawytsa mysiokehuhunahaze iwaze simypokzitsiubyitsa – niy. Iwa wohorek niy.

## 9

<sup>1</sup> Iwaze usta bijoikpe iknykta taporawy ziokehuhuku. Aba mytsyhyry wa botu nisiokehuhukunaha. Iwaze bijoikpe iknykta Deus tsumuēhītsa byrisoik wata bo iktsa iky. Bijoikpe ikny wytyk bo inasik. Aty ja myhyrizikpyryrykwy ibo nyny niy, iwaze hi myhyrizikpyryrykwy ihoke pomobara hokbowy nizapare niy.

<sup>2</sup> Atatsa byrisoik wata ihoke pamabara hokbowy nizapare, iwaze atsoko zatata zipoko. Izo

piwezokonaha zikywa. Haramwe zatata humo miwa. Nanabyitaba zatata humo naoktsĩbaik.

<sup>3</sup> Iwaze masetza zatata buruk wytyk bo inasik-naha. Asahi Deus harere humo pikzahatsa watsa kytsa nisihorokonaha.

<sup>4</sup> Estuba bijoikpe iknykta ispe niy:

– Hwitsa, iparikia, towahaditsa iwaha humo ka isty sarouk sarouk byitaha! Kytsa zuba tysihohoronaha. Siukpe watahabyitsa ty zuba jataha. Siukpe watahatsaktsa “Deus hyrytsa” asa humo ka awatutaha.

<sup>5</sup> Abaka isty baba byitaha byzoje mytsyhyrywaze tsimysitsapyriwykynaha, tysihohoronaha! – niy. Asaktsa masetza wakatsa kytsa pikzahatsa mysihohoronaha ziktsa watsa.

<sup>6</sup> Asaktsa Deus hyrytsabyitsa, asahi siukpe wataha byitsaktsa nisihohoronaha. Byzoje mytsyhyry wa pitsunahaze pikzahatsa humo sihohorohotsa watsa. Asahi:

– O katsaktsa tsimyokbanaha tsimyzihihikik-naha, tsimyokbanaha ja. Hawa skaraba tsimaha – niaha. Zikykbanahabyitsa tu sinini mykaranaha zuba.

<sup>7</sup> Asaktsa masetza pikuzatsa watsa, mowatsoronahaze mokymybanahatsa watsa. Siharek humo hyritywaha ouro ty sitsoriktsa. Kytsa ok watsa.

<sup>8</sup> Siharadi wytykyryk haradi waza. Sitsapu parini tsapu tsawa.

<sup>9</sup> Taharawe suk ty tububyita ty. Korobyk niaha. Sisarasuka wa tykburuktsa pikuzatsa mysikyrikinaha ziktsa watsa sisukyrytsitsa bo mowatsoronaha humo.

<sup>10</sup> Pikzahatsa wa tsa hi nisihohoronaha. Simyhohorowy humo kytsa mysitsapyriwynaha byzoje mytsyhyrytsa wa pitsunuhaze mysimyitsapyriwynaha. Asahi Deus humo siukpe wataha byizeka mysimyitsapyriwybanaha.

<sup>11</sup> Masetsa watsa ykzokotsa atakta ihoke pamabara tsiokezezerēna ezektsa pehatsa. Ebereu harere Abadō inarokota, kereka harere Aporiã inarokota, myharere – Atakta isopysapybyikita – my.

<sup>12</sup> Iwa. Amy ja mymypybytyky estuba botu ninyharamu, aba petok ka mozumu.

<sup>13</sup> Iwaze usta bijoikpe iknykta taporawy ziokehuhuku. Usta tsyhyry humo iziakyri nahawa ziokehuhuku. Ziokehuhukuze iaksoho jokmorēnikia wezokowy eze iwaby. Jokmorēnikia wezokowy ouro Deus okeryk, anaikny hi iaksoho iwaby. Jokmorēnikia wezokowy porawytsa niy. Sapetok sapetok paiko eze iwaby.

<sup>14</sup> Bijoikpe iknykta atahi iwaze babatu porawy ziokehuhuku iaksoho ipe nikara:

– Hyrikoso sapybara siakwarahatsa ty zoksaparety! Sapetoktsa sapetoktsa nawa buburu Euperetes inarokota bo. Anaeze karikutsitsiwytsa siakwaratsa. Tysisatsuknaha! – niy.

<sup>15</sup> Asaktsa bijoikpe iknyktsa kytsa abazubatsa sisukyrytsitsa mykaranaha. Mybarawy ezektsa tsapukte buruk mysipyknaha. Deus harere humo zoksapare maha hi piperykynaha. Nawa taeze ja ahabyitsa. Tozeka ja usta motyk tseheze ja. Usta byzoje ja. Usta okoroze ja. Deus myze – Abaka tsiponaha – my. Ana piwabynahaze

piponaha iwaze mybarawy ezektsa tsapukte bu-ruk mysipyknaha.

<sup>16</sup> Uta sodadutsa abazubatsa siakpyri iwaby. Abazubatsa dusētos mirioētsa pikuzatsa bete niukurunaha.

<sup>17</sup> Katsotyspykwaha eze sodadutsa pikuzatsa ahatsa iksinyky. Taharawe suk ty tububyita ty korobyk niaha. Wastuhu sirawe suk tsaririta izo hyrity watsa. Utsa harawe suk tsikakrēna harahareziktsa sipokzitsanikitsa watsa, sapiratsa watsa. Utsa sirawe suk tsitozoharēna ěsopire hyrity waha niaha. Pikuzatsa kino niwatihi. Pikuzatsa harektsa kino parinitsa harek tsa watsa niaha. Sisake buruk izo hyritywaha zipokorok. Ěsopire zatata izohyri waha sisake buruk zipokorok nikaranahaze.

<sup>18</sup> Izo, zatata, ěsopire aha hi pikuzatsa sake bu-ruk zipoko naha humo hi mybarawy ezektsa niakbakanaha. Asta okoro eze tu aba zuba niakbakanaha.

<sup>19</sup> Pikuzatsa sakeze, simyrawytsa siatsa eze aha. Siatsa pyryhyktsa harektsa watsa asa hi kytsa nisiborokonaha.

<sup>20</sup> Pikuzatsa atsokyka mybarawy ezektsa nisipyknaha. Nitarenahatsaktsa nanabyi sukni humo batu ity moewy aha. Hawa Deus humo tsimypokzitsirētsa, asaktsa sisuknihitsa humo simypokzitsirētsa. Sinamy ouro sukni hi, parata sukni hi, iku sukni hi, hwi sukni hi, harahare sukni hi, iwa sinamy tahatsyhyry ty ty nisisuknikinaha asa hi siakparawy. Sisuknihitsa ba waby zikaha, ba zikozonaha, ba pão zikaha

iwa iwatsatu sinamy siakparawy, sisoho humo mytsaty ahabyitsa tu nikaranaha:

— Katsakta mynamy hi mydeus maha — nikaranaha. Hyrikoso sapybara kino niwatihi siakparawy siharere humo hyŷ mykaranaha batu pyk zikaha, Deus babata humo ka batu yhy zikaha.

<sup>21</sup> Utsa kytsa mysibanaha humo kino ba ma zikaha. Kytsa tahakparawybyitsa myrawy ty nyny nikaranaha. Usiza bo nisipyripyrirykyk-naha. Utsa kytsa namy bo batu iksa zuba zikaha. Sitsyhyryboarëtsa. Iwa sisopyktsa zikzurukunaha sisopyksapybyitsa nikaranaha moewy ahabyitsa ziknakaranaha.

## 10

### *Bijoikpe iknykta papeu tuk inasik.*

<sup>1</sup> Kyze usta bijoikpe iknykta tsipaikrëta inasik. Isuk zatata hyritywa niukuru. Tsokma iharapu taba nazikto. Iok haramwe wa niu. Iektsa wahoro putotowytsa wa izo wa niukuru.

<sup>2</sup> Papeu tsibik itsipyk eze niapykyryk. Papeu nizapare iwaze kytsa pinykynaha. Taeknury taba buburu zuba bete pare niy. Taekwazo taba wytyk bete pare niy.

<sup>3</sup> Iwaze opykani kakaik niyze, parini kakawa niy. Kakaik niyze nitotokorok. Sizubarëtsa sete aha nitotokoroknaha.

<sup>4</sup> Nikaranahaze nitotokoknahaze papeu humo iwatahatsihikikze iaksoho bijoikpe ikny kape niy:

— Nitotokoknaha ty ka iwaby zuba ity wataha wataha byity! Ana tsihokdahaŕëna iwaze mektsa bo ba ziwataha — niy.

<sup>5</sup> Iwaze bijoikpe iknykta taeknury taba buburu bete pare usta taba wytyk bete pare niyze tapanyuryk taba jobo sukyhy niy, ana bo hi ikozo. Atahi Deus ziwabyze:

<sup>6</sup> – Atakta koikny bakta tu tawahi mynapykyryk ata hi bijoikpe, mybarawy, buburu zuba iwa nizukni, abazubaha bijoikpe eze ky abazubaha mybarawy eze ky, abazubaha buburu buruktsa iwa mybarawy nizukni – niy. Atahi kaharere piwabyky iharere zuba motsasoko:

– Abaka bapyk ziky – niy.

<sup>7</sup> Amy botu nitsasonaha, anawahi myzehikik kasohotsitsa zitsumuēhīkīnahatsitsa bo kino atsatu mykara. Tapara nizihikik naha ka tsihokdharēna ana humo ka batu aty tohi ihyrinymyryhuk. Bijoi kpe iknykta porawy ziokehuhukuze, iwaze Deus nizihikik naha ka tsihokdharēnikia aba kino atsaty ty mykara my. Iwa Deus harere niy.

<sup>8</sup> Iwaze iaksoho bijoikpe ikny iwabykynaha. Kabo nitsasokozo:

– Bijoi kpe iknykta mybarawy bete, buburu zuba bete nataba pare nataba pare niriktohoko ibokta! Papeu tsibik itsipyk eze ky tyzibykykta! – niy. Hyŷ iky.

<sup>9</sup> Iwaze uta ibo ikparak. Ipe iky:

– Na ty papeu atsi kpykezeky ty kabo nynytykta – iky. Yhŷ niy. Iwaze kabo nyny niyze. – Papeu ty hauktykta! Asake eze titsarokrēna pete waha mozik. Tsipihuruzukze arakokeze tsibuarēna mozik – niy.

<sup>10</sup> Papeu bijoikpe iknykta itsipykezeky ibykyk. Papeu ty hauk ikyze kasakeze titsarakrēna niyzik. Ihuruzukze karokokeze tu tsibuarēna niyzik.

<sup>11</sup> Kyze kape niyzo:

– Deus wasania ty tytsasokta! Hawa Deus ibo mysioktyhyryk tsihikik aparakbaha bo tytsasokta! Kytsa aparakbaha abazubatsa meky mekywatu sihareretsa, abazubatsa sipehatsitsa nanabyitaba sihudikhudikwy ezektsa iwa aparakbaha ibo mysioktyhyryk tsihikik. Iwa kytsa abazubatsa Deus wasania ty tytsaso! – niy.

## 11

### *Petoktsa isotsitsa.*

<sup>1</sup> Kyze bijoikpe iknykta hwibihi ty iwatawywy ty kabo nyny niy. Deus harere kape niy:

– Kyikykykta! Kawahoro zubata tsiwatawy! Jokmorēnikia wezokowy ty tsiwatawy! Hana wa tsa ja kytsa kabo mosakibazikiknaha. Asaktsa: “O ikia zuba tsamysapyrēta” mykaranaha. Ikie sibo iktsa tsimyze. Hana wa ja tsimysiwatawy.

<sup>2</sup> Wahoro pe ty ka watawy watawy byity. Kytsa Sesus humo sispirikpobyitsa ana bete pare maha – niy. Asiba estuba tsyhyrywy motyk tseheze pimyinaha. Kahudikhudikwy tsiziurēna kuarēta dois byzoje pitsunahaze pimyikinaha.

<sup>3</sup> Miu, dusētos e sesēta wa purunahaze. Anaeze wytykyryk petokzahaza mysipeha kaharere motasonaha. Sisuk panu boroho waha ty korobyk niaha. Zikzibytuhukunahatsa kytsa Sesus bo batu yhỹ niaha iwatsahi batu sispirikpo ispe niaha:



– Ahamysapybyitsa tsikykaranahaze ka tsi-moewynahaktsa! Deus harere bo matahaktsa – mykaranaha.

<sup>4</sup> Petokzahaza kasohotsiza oriwereja waza petok rikapuwu suk waza maha, asaktsa mybarawy ezektsa nisipokzitsikita baze niriktotohokonaha, Deus harere bo hyŷ mykaranaha.

<sup>5</sup> Ustsa kytsa pahapesukyrykynaha zeka ba zikaha. Izo sisake buruk tahasukyrytsitsa bo iwa ustsa mysisyukyrynahaze mysibanaha.

<sup>6</sup> Asiza hi kazikwy situk mynapykyryk. Kazikwy ty sibo nyny iky. Kaharere motsasonahaze asiza hi. – Hyritsik ba ziknawōzo – maha zeka ba ziknawō, pupuputsa siharere humo ispu mozik. Mybarawy ezektsa bo amy imysapybara humo zikino siharereze nanabyi humo mymyzuwykynaha. Nanabyi humo mozihikiknaha zikino mykaranaha. Mytsasonahaze yhy maha iwa amy mozihikiknahaze hi ana kino atsawatu mykaranaha.

<sup>7</sup> Kaharere nitsasobanahaze sirara tserirēta mozumu myzubaha humo kino tsimypybytyharēta atahi ihoke pomobara buruk myzoik. Kasohotsiza mysihudizuze iwaze mysiba.

<sup>8</sup> Iwaze sihudikhudikwy Serusarēhe inarokoha eze asiza inury motarenaha. Anaeze sipehatsa iharapatawyhyta humo zihyrizikiknaha iwa ha eze zibezenaha. Anaeze sihudikhudikwytsa simysapybyitsa tu nikaranaha, Sodoma ezektsa watsa, Esito ezektsa kino niwatihi sizubarētsa simysapybyitsa nikaranaha.

<sup>9</sup> Kytsa abazubatsa nanabyitabaktsa, kytsa aparakbahatsa abazubatsa, nanabyitaba sihudikhudikwytsa, asaktsa meky mekywatu tahaharere humo mopamykysokonaha iwatsa sinury bo nikozonaha. Harakykbyihi zuruze asiba zuruzoze sibo iktsaziu niaha. Asaktsa batu tahatotonaha niaha batu iwa aha!

<sup>10</sup> Mybarawy Ezektsa sakurētsa. Kasohotsiza mysibanahaze sakurētsa moziknaha. Tahamyikahakanaha. Sakurētsa hi tahanamy pibiakaknaha. Kasohotsiza harere batu siakparawy, sihumo sinini nikaranaha iwatsahi siharere nepyk-baze sakurētsa niyziknaha.

<sup>11</sup> Iwaze harakykbyi hi zuruze tokbaha eze Deus hu niy. Sibete hu niyze inasihyryzikpo. Kykyik niaha. Mybarawy Ezektsa ana bo iktsa niahaze sipybyrētsa niyziknaha.

<sup>12</sup> Petokzahaza Deus iaksoho upyk inasihyryzikpowynahaza iwaze ispe:

– Pany! – niy. Ana ziwabynahaze jo bo nidoknaha. Sisukyrytsitsa sibo iktsa niahaze zatata buruk tu bjoikpe bo nidokoroknaha.

<sup>13</sup> Iwaze babatu wytyk nitydydykyk iwaze sihudikhudikwy tsapukte buruk zitsepetoktokbaiknaha, kytsa abazubatsa niakbakanaha wytyk nitydydykyk naha humo sete miutsa niakbanaha. Niwaknahatsaktsa tahapybyspyk. Iwatsahi Deus pe niaha – O ikia zuba tsapunihikrēta, ikia bjoikpe eze tsimyharerewabyrēta – niaha. Tahapybyspyk kabo nipamykysokonaha.

<sup>14</sup> Iwaze mybarawy Ezektsa petok baba imypybytyky iwaha nimyharamu. Byri! Usa aba mozumuzo. Harakykbyihi mymypybyty humo maha.

*Porawy ziharawy.*

<sup>15</sup> Iwaze ziharawy babata usta bijoikpe iknykta porawy ziokehuhuku. Botu usta tsyhyry humo petok ty hu niy abaka mopykyryk. Ziokehuhuze kakaik niaha siaksoho opykani iwaby.

– Abaka Deus zuba mybarawy pehatsa. Kiristu zipehata niwatihi abazubatsa mysipeha. Aba zuba mymypokzitsita, tawahi mybarawy ezektsa nasipehaka. Bapyk ziky – nikaranaha.

<sup>16</sup> Iwaze taparaktsa wīte kwatero ahatsa Deus okeryk tahaekaratsa humo puruk puruk nikaranaha iwaze okmymy okmymy nikaranaha ihumo sispirikporētsa iwatsahi inatsunaha. Asaktsa tahadyhywy bete nidyhydyhykynaha Deus baze asahi iokeryk okmymy okmymy nikaranaha.

<sup>17</sup> Deus pe nikaranaha:

– O Deus ikia zuba tsamysapyrēta.

O Deus ikia tsamypokzitsiarēta ikia zuba Deus babata.

Koikny baktatu ikia ahyrinymyryta babata.

Tsamylharerewabyziurēta           atsaezubaha  
tsimynakara.

Azikwyrēnikita ba hawa tohi zasukninaha.

Abaka abazubatsa mybarawy ezektsa  
mysipeha anahumo hi mykurētsa.

<sup>18</sup> Asukyrytsita ahumo tahakyrikinaha.

Asaktsa aharere bo batu yh̄y mykaranaha  
ahumo sinini mykaranaha iwatsahi  
sakyriukrētsa mykaranaha.

Asaktsa imysapybyri humo nikaranahatsa humo  
sinini mykaranaha ana hi sihuak waha.

Abaka abazubatsa botu niakbanahatsa huak ty sibo nyny tsimy. Hawa mybarawy eze zikzurunaha zeka ihuak ty nyny tsimy.

Asohotsitsa atsumuēhĩtsa kino niwatihi ihuak ty sibo nyny tsimy.

Atyryktsa abazubatsa bo ihuak ty sibo nyny tsimy.

Asaktsa aharere bo hyĩ mykaranaha.

Myhyrizikwanitsitsa pykyhy myhyrizik-wybyikitsa kino niwatihi sihuak ty sibo nyny niy.

Abaka asaktsa mybarawy ezektsa mysiakninaha asaktsa ikia tuk ba zikakpykyknaha asahi mohokdanaha – nikaranaha.

Iwa taparaktsa Deus bo niaha.

<sup>19</sup> Iwa Deus wahoro zubata hokbowy bijoikpe eze zoksapare niy. Anaeze kytsa Deus myspirikpowy harahare humo iwatahaha ouro suk eze mynapykyryk. Atsoko ihyrikoso humo siaksoho ziwabynaha. Pare parezo nikara. Wytyk nitydydykyryk tu. Iwaze hyritsik harahareziktsa ty nawõkõ abazubatsa bo inawõkõ. Iwa hỹ.

## 12

### *Hotsoikarazata wytyk zibezezyky.*

<sup>1</sup> Kyze bijoikpe eze abazubaha iwatawy natakaha. Ba aty tohi niwaha ty tyny. Tapara wytyk bo iktsa iky, atatsahi isuk hi haramwe bo mokozoneha. Byzoje ipyrytsa upuk eze niapykyryk. Itsorik ka byrisoiktsa niapykyryknaha. Dose byrisoiktsa ty niaha.

<sup>2</sup> Atatsa hi tabykyhytatsa. Itsapyri humo kadi nikara.

<sup>3</sup> Kyze usta inymyryhywy bijoikpe eze natakahazo. Hotsoikarazata tsariribahata ana bo iktsa iky. Sete harektsa, itsorik ouro hi niwatihi siharek watu sitorsik isipehatsaktsa zuba maha. Iharanitsa humo kino niwatihi. Asaktsa mytsyhyrytsa watsa. Sitorsik humo kino niwatihi siharek humo tahawatu pupuwa iwaha inykyry.

<sup>4</sup> Ia humo byrisoiktsa sizubarëtsa nisikyrihyk tsapukte buruk byrisoiktsa nisikyrihyk, byrisoiktsa bijoikpe ikny iwaze wytyk bo nasipaparaka. Tabykyhytatsa okeryk hotsoikarazata pyk niy. Ibykyhy mopurukze ziborotsihikik iwatahi iokeryk pyk niy.

<sup>5</sup> Atatsa bykyhy nipurukze maku skyry niy. Atahi kytsa abazubatsa mysipeha, batu aty tohi iharere bo batu yhÿ zikaha. Atakta upepe hyrity wata itsipykeze iwa myzubaha bo mysipeha. Upepe pokso myzubatsa iharere bo hyÿ tsimykaranaha.

Nipurukze Deus tihi zioktyhyryk, jobo nido. Deus dyhywy anaeze kytsa nisipeha nabo niy iwahi hotsoikarazata taba ziboro.

<sup>6</sup> Wytyk niwatihi jerukbara bo niwakik. Anaeze Deus isapy botu zikymy, anaeze Deus atatsa humo tsimypokzitsiukrëta. Nawa puruze miu dusëtos e sesëtos iwa ihumo tsimypokzitsiukrëta.

<sup>7</sup> Atsoko bijoikpe eze Mikeu tuktsa hotsoikarazata tatuktsa ahatsa niwatsorokonaha. Mikeu tuktsa bijoikpe iknyktsa Deus tsumuëhÿtsitsa maha. Hotsoikarazata tuktsa tapara bijoikpe iknyktsa niwatihi. Deus harere bo yhÿ ahabyÿtsa hi hotsoikarazata nisioktyhyryk hyrikoso sapybara niyziknaha.

<sup>8</sup> Mikeu tuktsa sipaikrētsa iwaze hotsoikarazata tuktsa nepykbanaha. Bijoikpe eze hyrikoso sapybara ba ziktarenaha. Deus ispe niy:

— Nabo pãotaha! — niy. Nitururuknaha meky botu tahasapynaha.

<sup>9</sup> Tubabatu hotsoikarazata pyryhyk niy. Hyrikoso sapybara perytsa nisipehaka Satanas inarokota. Mybarawy eze ktsa mysispihikbataikik. Iwaze bijoikpe ikny nisipapykik iapiktsa ituk. Mybarawy bo nasipaparahiknaha.

<sup>10</sup> Kyze iaksoho iwaby bijoikpe ikny kakaik niy. Atahi:

— Abaka Deus tyryktsa tabo mysioiktyhyryk. Mybarawy eze ktsa sibetesatsa ana ihyriziktsokzawy nepykba. Abazubatsa izikwy bo iktsa niaha. Izikwyrēnikita tu hawa tohi ba zikzukninaha. Deus zipehata mywata Sesus Kiristu atahi kytsa abazubatsa. Isokpykziurēnikita. Tsihyrizikporēnikita. Hotsoikarazata tsiharerewabymybarēta bijoikpe ikny itapapykwy. Mytukytsa soho Deus bo nisispihikbataikik. Okoroze unata kino niwatihi Deus okeryk sisoho ty zispihikbataikik. Deus tihi bijoikpe ikny inapapykik.

<sup>11</sup> Mytukytsa Sesus tuktsa Deus zikwy humo sipunihikrētsa niyziknaha. Utsa kytsa nisiba tsihikiknahaze Sesus humo sispirikporētsa iwatsahi batu pyk niaha. Batu sipyby. Ihumo nispirikpo-tohinaha. Atahi hozipyrykza tsibik wata sisapyzeky nihyrikosokda iwatsahi sispirikporētsa niyziknaha. Atahi sisapyzeky nihyrikosokda ispu

nipuku iwaze sispirikporëtsa niyziknaha. Abazubatsa bo wasape nitsasokonaha. Deus wasania ty nitsasoikiknaha. Iwatahi Satanas sisoho ziwabyze takyriki itsapyriwy nepykbaik.

<sup>12</sup> Iwaze bijoikpe ezektsa ahakurëtsaktsa! Mybarawy ezektsa ihumo sisukatsihikrëtsa. Pihik ezektsa niwatihi sinini mykaranaha. Hyrikoso sapybara pehakatsa mybarawy eze iwatsahi ihumo sinini mykaranaha. Atahi sibo inasik iwatsahi ihumo sinini mykaranaha. Atakta takyriki, bykyzehu zuba Sesus tuktsa imyitsapyriwy mopykba ana humo hi takyriki.

<sup>13</sup> Iwaze hotsoikarazata mybarawy bo tapapykwyze mytsaty niyze: “Kasapy bijoikpe eze tu nihokda tawahi tasapy” – niy. Iwazehi wytyk tabykyhy zepuruktatsa zikziapikiktahi.

<sup>14</sup> Iwaze Deus petoktsa isarapaiktsa ty atatsa bo nyny niy. Wohorek abazuba ta sarapaikty hi niy. Iwatatsahi jerukbara bo nitsatsaka, tasapy bo niy. Anaeze atatsa humo tsimypokzitsiukrëta, harakykbyihi usa itsapukte buruk piytyktsehize. Deus atatsa humo pipokzitsi anaezeka hotsoikarazata batu itykni.

<sup>15</sup> Iwaze hotsoikarazata pihik tasake ezeky zipuku buburu hyrity waha niapykyryk. Wytyk hapik hi buburu maha wa iapik niukuru. Tozeka ja nawaze pihik humo mytuba nikara.

<sup>16</sup> Mybarawy atatsa zitsumuëhĩkĩ iwaze hi wytyk awatubara isakikihawaha. Pihik zikuba hotsoikarazata saki zeky inapuku naha zikubaik.

<sup>17</sup> Iwatahi hotsoikarazata wytyk humo takyriki. Iwaze niparak. Atatsa itsekokatsa bo niy. Sizubarëtsa Deus harere bo hyÿ nikaranaha,

asahi Sesus spirikpowy bo hyŷ nikananaha ana humo hi wasani mozurukunaha, wasaniha soho motsasokonaha sibo hi niwatsorokonaha. Hotsoikarazata nisibatsihikik.

<sup>18</sup> Hotsoikarazata nimyra eze niriktohoko.

## 13

*Itsikarara usta hotsoikarazata wata ziktsotspykze iny.*

<sup>1</sup> Kyze itsikarara buburu zuba ikny inazokota bo ikozo iharanitsa mytsyhyrytsa watsa. Siharektsa sete niy. Estuba mytsyhyrytsa usta taba petoktsa watsa iharektsa iharanitsa watu itsorikta, asaktsa kytsa pehatsitsa tsorik hyrity watsa niaha. Siharek watahatsa. Imysapy byikiwy ty ziwatahaha iwaha siharektsa humo. Deus soho humo hi batu mysapy nikananaha iwahahi siharek humo iwatahaha.

<sup>2</sup> Itsikarara atakta parini hyrity wata niy. Ipyrytsa sirara tsiakyriukrēta uruso pyrytsa watsa. Isake parini sake wa niy. Iwaze hotsoikarazata tazikwy ty itsikarara bo nyny niy. Iwatahi kytsa pehatsa niyzik. Asaktsa hotsoikarazata harere bo hyŷ nikananaha, itsikarara harere bo kino niwatihi hyŷ nikananaha hotsoikarazata hyrikoso sapybara pehakatsa.

<sup>3</sup> Estuba itsikarara iharek skohota nizororo. Asiba nirata tu. Maku maktsa mywata zeka mora. Hotsoikarazata zikwy humo nizororo. Kytsa abazubatsa ipokso nipybybaiknaha. Asa hi:

– Amy skaraba myhumo mahani iakyri – niaha. Iwatsahi ituktsa niyziknaha, iharere bo hyŷ nikananaha.



<sup>4</sup> Kytsa humo hotsoikarazata okeryk inaranahana, ata humo hi zikwy ty itsikarara bo nyny niy. Kytsa kino niwatihi itsikarara okeryk inaranahaze asa hi:

— Itsikarara zuba zikwyrēnikita, hawa tohi ba zikzukninaha — iwa mybarapetu nikaranaha. Amy ty Deus bo zuba tsimypamykysokonaha ty ka atsa tyty itsikarara bo nikaranaha.

<sup>5</sup> Hotsoikarazata itsikarara pe. — Deus soho humo aharezeziubyihukta! Amy tsimyzehikik naha ty zuba ty! Isoho tsimysapybyri: — niy. Deus byzoje kuarēta dois zitsuze anaeze kytsa nisipeha.

<sup>6</sup> Iwatahi itsikarara Deus ziharereziubyiki imysapybara ty nitsasoko. Deus harere soho zisapybyriki. Deus sapy humo zisapybyriki. Asaktsa bi-joikpe ezektsa humo kino niwatihi nisisapybyriki.

<sup>7</sup> Hotsoikarazata itsikarara pe niy:

— Deus tuktsa bo tywatsoronaha. Iwatahi Deus humo batu siakparawy — niy. Hotsoikarazata zikwy ty itsikarara bo nyny niy. Izikwy humo sizubarētsa aparakbahatsa bo bipyritsa hudikhudikwy ezektsa, meky mekywatu siharere, nanabyitaba sihudikhudikwy ezektsa iwa izikwy humo iharere siakparawy.

<sup>8</sup> Iwatsahi mybarawy ezektsa sizubarētsa itsikarara Deus wata mytsaty ahabyitsa nikaranaha. Asa zuba Deus papeu humo sinaro itsikarara bo yh̄y niaha. Hozipyrykza tsibik wata nira papeu humo sinaro ziwataha. Deus mybarawy nizukni isuknihybyize sinaro botu ziwataha, hozipyrykza wata ipapeu humo niy. Asa zuba itsikarara harere bo batu yh̄y nikaranaha.

9 Iwatsahi ikiahatsa tsimyzihihikiknaha zeka wabytaha tsiwabyziunaha.

10 Aty Deus humo sakyriukrēnikitsa tyhurukwy zeka ta hurukwy. Aty tabezewy zeka sokorotsapuzeze ty pibeze.

Iwatsahi Deus tuktsa sipunihikrētsa niyziknaha. Siakubyrisorokrētsa zeka sinini mykaranaha zeka Deus humo mospirikpotohinaha. Iwa hỹ.

11 Kyze usta irara tsakyriukrēta bo iktsa iky. Abaka petoktsa niy. Wytyk ekze nizohik. Iharanitsa petoktsa zuba hozipyrykza wata. Hotsoikarazata aksoho wa batu imysapy niy.

12 Itsikarara tsumuēhĩtsa niy. Tsiharererēta niy. Mybarawy ezektsa pe niy:

— Itsikarara harere bo hỹ taha! Atakta itekihikta nizororota iharere bo hỹ taha! — niy. Itsikarara hotsoikarazata zikwy usta bara ty irara tsiakyriukrēta bo nyny niy.

13 Iwaze atakta kytsa ziknahabara ty nikara itsikarara hi nikara. Izo bijoikpe ikny iharere humo inatsuku. Kytsa abazubatsa ana bo nikozonehaze sipybyrētsa nikaranaha.

14 Amo kytsa batu zikaha atakta mykara iwatsahi kytsa ipe maha:

— O ikia tsamysapyrēta — nikaranaha. Sispirikpobyitsa tu — atakta imysapyrēta — mybarapetu nikaranaha. Iwataha humo itsikarara inymyryhywy niy. Kytsa abazubatsa iharere bo hỹ nikaranaha irara tsiakyriukrēta. Kyze kytsa pe niyzo. — Itsikarara hyrikoso tyzokninaha tsimaha! Atakta sokorotsapuzeze

ty itekihikta niratatu ata wata ihyrikoso tyzukninahakta! – niy. Hyỹ nikaranaha.

<sup>15</sup> Izoknihita itsikarara hyrikoso waha nipykze irara iakyriukanikita ibo hu niy. Iwaze itsikarara hyrikoso wata inahyrizikpo, mopamykysoko. Kytsa iharere bo yhỹ ahabyitsakta tysibaiknaha.

<sup>16-17</sup> Itsikarara hi:

– Kanaro ahapanuryk taba ahatsyhyrysukpe humo tsiwatahanaha. Ahaokpe humo kino niwatihi kanaro tsiwatahanaha. Kanaro ty tywataha byizeka mysisininiwy – niy.

Iwa mybarawy ezektsa abazubatsa nisipeha. Kytsa batu sibo tysapykyk, abazubatsa, myhyrizikwanitsa, pykyhy myhyrizikbyikitsa sinamyrẽtsa, sinamybyitsa, asakta tsumuẽhĩkĩnaha batu okyrysaroko, asakta simozikrẽtsa nikaranaha iwa abazubatsa maha siokpe humo inaro tsiwatahanaha, sitsyhyrysukpe humo kino niwatihi inaro tsiwatahanaha. Asakta inaro humo tywataha byizeka ba zikhuaknaha sinamy ba zikhuak zikaha. Iwatsahi batu amy tohi tyhuak niaha. Batu amy tohi ty nyny zikaha. Inumero bo iktsa tsimahaze inaro soho bo mytsaty tsimykaranaha.

<sup>18</sup> Ana bo hi tsinymyrykynahakta! Tsinymyrykynahaze, iwatahawy kino niwatihi ahahyrinymyrẽtsa. Iwatahawy maku naro wata. Inumero 666 my.

## 14

*Deus tyryktsa nisakibazikiknaha.*

<sup>1</sup> Kyze usta bo katsotyspykze iktsa iky. Atakta nira hozipyrykza tsibik wa ta ibo iktsa iky. Hara

jobo Siaõ inarokota harabete niriktohoko. Kytsa abazubatsa ituk niaha sêto kuarêta kwatero miutsa. Inaro ty siokpe watahatsa, izo naro kino niwatihi siokpe watahatsa.

<sup>2</sup> Iaksoho bijoikpe ikny iwabyky. Iaksoho ihiridawy iakpyri waha. Iaksoho hyritsik bipyri wa niukuru. Sipamykyziuwytza sisukasapyrêtsa nisakibazikiknaha.

<sup>3</sup> Deus pauk baze nisakibazikiknaha 144.000 ahatsa. Sisakibazikezytyk nisakibazikiknaha. Siraratsa sispitu sapetoktsa sapetoktsa iwa siokze tapara taypykyknahatsa wîte kwatero ahatsa niwatihi sisakibazik iwaby. Sizubarêtsa anasoho batu sihyrinomyry. Asa zuba 144.000 miutsa botu Deus bo nisioktyhyryk Deus tuk mynapykyryknaha asa zuba sisakibazik ezytyk humo sihyrinomyrêtsa hỹ.

<sup>4</sup> Asaktsa wasani nikaranaha sihyrizikporêtsa Deus harere bo hyỹ ziknakaranaha. Asaktsa hozipyrykza tsibik wata atahi nihyrikosokda ituk napykyryknaha, Sesus harere bo hyỹ mykaranaha. Mybarawy ezektsa sispirikpobyitsa situk ba zikapykyryknaha. 144.000 miutsa Deus bo nisioktyhyryk iharere zuba nizihikiknaha. Sesus Kiristu nisioktyhyrykta. Abaka tahawahi Deus tuk mynapykyryknaha hỹ.

<sup>5</sup> Utsa bo batu zikaha. Simysapyrêtsa ba zik mospihikbatanaha.

*Bijoikpe iknyktsa harakykbyihi sisoho nitsasokonaha.*

<sup>6</sup> Kyze usta bijoikpe iknykta bo iktsa iky. Atahi joboni nitsatsaka. Mybarawy ezektsa bo Deus wasania ty nitsasokoro anahumo

hi zipeha. Abazubatsa mybarawy ezektsa bipyritsa bo, nanabyitaba sihudikhudikwy ezektsa bo, ityryktsa sizubarētsa meky meky watu siharere iwatsa sibo abazubatsa Deus wasaniha nitsasokoro. Deus wasaniha humo batu pyk, tawahi kytsa ihumo sispirikporētsa ana hi motsasokonaha.

<sup>7</sup> Bijoikpe iknykta opykani hua hua niy:

– Deus harere humo tsiwabytoktonaha! “O Deus ikia zuba tsasopykziurēta, aharere humo ma tsimykaranaha” tsimahaktsa! Iwa tytsaso. Aibani zuba kytsa abazubatsa huak ty sibo nyny my. Hawa mybarawy eze ziknakaranaha humo sibo ihuak ty nyny my. Deus hi bijoikpe, mybarawy, buburu zuba pupuputsa iwatsa nisisukni atahi ihuak ty mybarawy ezektsa bo nyny my – niy.

<sup>8</sup> Kyze usta bijoikpe iknykta taparababakta hapik niy. Iwaze niy:

– Asaktsa sizikwytsa Babironija ezektsa nepykbanaha abazubaha inarokoha. Simysapybyitsa nikaranaha tsahi nepykbaik. Hawa kytsa ustsā bo tsōsī waha ty nyny niaha iwaze ihumo simopykyhybyitsa mynapykyryknaha siwatsa niaha. Abaka sizikwy nepykbaik, hawa wihara nibibibaikze wytyk bo natsuku iwa sizikwy nepyk. Sisapy natsehepetok – niy.

<sup>9</sup> Kyze usta bijoikpe iknykta, iapik niukuru abaka harakykbyihi joboni nitsatsakanaha. Jaksoho opykani hua hua niy atahi:

– Asaktsa itsikarara, ihyrikoso kino niwatihi ispe: “O ikia tsamysapyrēta tsimy” nikaranaha. Asahi sinini mykaranaha. Asaktsa sitsyhyrysukpe panuryk taba inaro ziwatahaka siokpe

humo kino niwatihi ziwatahaka iwatsahi sinini mykaranaha —.

<sup>10</sup> Deus sihumo takyriki, iwatahi batu isty pokzitsi iwatahi mysimyitsapyriwybaka. Batu isty wak. Izo eze sinini mykaranaha, ěsopire mokorobaka anaeze mysisininiwynaha. Atakta hozipyrykza tsibik wa ta nira, iokze sinini mykaranaha. Bijoikpe iknyktsa Deus tsumuĕhĩtsitsa kino niwatihi sinini mykaranahaze sibo mokozokonaha.

<sup>11</sup> Sinini mykaranahaze izo zatata jobo tawahi myzukuruk. Unata, okoroze niwatihi zatata piwezoikik, asaktsa sinini ykarawy bo tahawahi napykyryknaha. Asaktsa itsikarara, ihyrikoso kino niwatihi ispe niaha:

— Ikia tsamysapyrĕta — niaha. Asahi inaro ty tahanury humo ziwataha abazubatsa sinini ykarawy bo tahawahi napykyryknaha. Anaeze batu sibiryrywyhuk.

<sup>12</sup> Iwatsahi Deus tuktsa — ahapunihikrĕtsaktsa — tynakaranaha. Siakubyrisorokrĕtsa tu zeka sinini mykaranahaze Sesus humo myspirikpotohinaha. Asaktsa Deus harere bo hyĕ mynakaranaha.

<sup>13</sup> Kyze jaksoho bijoikpe ikny kape niy:

— O mybarawy ezektsa wastuhu sakyriukrĕnikitsa Deus tuktsa mysibanaha. Sesus humo sispirikporĕtsa iwatsahi mysibanaha. Iwa tsatu sakurĕtsa maha. Ana kino tsiwatahakta! — niy. Deus hyrikoso tihi:

— Yhĕ, amy ty wasape tsimy. Mybarawy eze tuze Deus hyriziktsokzawy humo zuba nikaranaha, ihumo zitsumuĕhĩkĩnaha.

Niakbabanahaze tahabyrynaha, hawa sinini ziknakaranaha ana humo hi myspirik-tsokdanaha. Sihyriziktsokzawy huak situk napykyryknaha – niy. Iwa Deus hyrikoso niy.

*Mydisahawytsa izozikwy.*

<sup>14</sup> Kyze katsotyspykze ikozozo. Bijoikpe zatata tsibarazarēna bo iktsa iky. Maku hyrity wata bijoikpe zatata bete nidyhyky. Ouro ty itsorikihita niy. Itsipyk eze penari ty wabehata niy. Tsit-sarirēta.

<sup>15</sup> Usta bijoikpe iknykta Deus hudikhudikwy ezekta izoi. Atakta bijoikpe zatata bete nidyhykta bo huahua niy. Ipe niy:

– Kytsa disahawytsa watsa tysizoziknahaktsa! Iwaze babatu wihara wata nakymy. Iwaze penari ty tysizoziknaha! – niy.

<sup>16</sup> Atakta bijoikpe zatata bete nidyhykta tyk bo niy. Mybarawy bo penari ty nisizozikba. Iwa abazubaha zizozikbaik.

<sup>17</sup> Kyze usta bijoikpe iknykta bo iktsa iky. Deus hudikhudikwy ekze izoi. Ata kino niwatihi penari ty wabe niy. Titsarirēta.

<sup>18</sup> Usta bijoikpe iknykta jokmorēnikia wezowy niparak. Atahi izo perykytsa niy. Atakta huahua niy. Tatukta bo penari zibykykta ipe niy:

– Duabohotsa nijakuknaha hỹ. Duabohotsa suk penari ty tynasisukzyzyk! – niy.

<sup>19</sup> Iwatahi wytyk bo niy. Duabohotsa suk nasukzyzykba. Nepykbanahaze duabohotsa suk

bo pokpok niy, anaeze duabohotsa nisipyryrikiknaha. Deus kytsa iharere bo batu hỹ mysimy-itsapyriwy. Hawa duabohotsa tsik zipyryrikibanaha, iwata kytsa Deus humo sispirikpobyitsa sinini mykaranaha.

<sup>20</sup> Hudikhudikwy pauk bo duabohotsa nisipyryrikiknaha. Duabohotsa tsik tsizubarēna zipyryrikiknaha ana hi sispirikpobyitsa spu waha. Kytsa Deus harere bo batu hỹ nikaranaha sispu tsizubarēna teresētos kirometeros sispu mosokok niaha. Sispu meteros estuba zihiboani mopupuku. Kytsa Deus harere bo batu yhỹ sispu sok niaha hỹ.

## 15

*Bijoikpe iknyktsa mymyitsapyriwytsa tuk kat-sotyspyk eze iny.*

<sup>1</sup> Kyze bijoikpe eze ustsā aba zubaha inymyryhywy bo iktsa iky. Batu aty tohi humo ihyrinymyryhuk. Tsihokdaharēna batu inymyryhy. Ana humo hi kapybyrēta ikykara. Usta tsyhyry humo petok ziakyri sete bijoikpe iknyktsa bo iktsa iky. Asaktsa myitsapyriwytsa usta tsyhyry humo petok zibykyknaha. Ana kino mybarawy bo myzipaparanahaze Deus iakyriwy mopyk. Deus ispe niy:

— Kamyitsapyriwytsa mybarawy bo tsipaparanahaktsa! Mybarawy ezektsa bo asaktsa kahumo batu sispirikpo iwatsahi kaharere humo batu yhỹ nikaranaha sinini mykaranaha — niy.



<sup>2</sup> Kyze buburu zuba widero waha bo iktsa icy, Buburu zuba izo ty tsakykyhy hawa iwatatu tsit-sikworororēta. Buburu zuba baze kytsa bo iktsa icy. Deus botu sipamykyziuwytša ty sibo nyny niy. Asahi itsikarara bo niwatsoronaha, ihyrikoso ana izikwy nepykba niaha. Atakta inaro ihumo kino niwatihi niwatsoronahaze izikwy hi nepykba. Abaka Deus bo nipamykyziukunaha.

<sup>3</sup> Deus bo nisakibazikiknaha. Moises Deus tsumuēhītsa harere ty nisakibazikiknaha. Atakta nihyrikosokda hozipyrykza tsibik wata, iharere kino niwatihi nisakibazikiknaha. Asahi:

— O ikia hi tsimymypokzitsiki ikia zuba Deus babata.

Apunihikrēnikita ba hawa tohi tasukninaha.

Hawa ha tsimykara zeka tisapyrēna hỹ.

Tsahyrikizikporēta hawa tsimykara naha wasani.

Ikia zuba aparakbaha tsimysipeha.

Kytsa bo tisapyrēna ty sibo nyny tsimy.

Wasape haty zuba tsimypamykyso.

<sup>4</sup> Iwaze abazubatsa aharere humo piwabytoktonaha.

Aparakbaha ikia abazubata maha. Ikia zuba tsasopyksapyrēta.

Batu isapybara ty ziky. Iwaze parakbaha abo mozumunaha.

Mybarawy ezektsa abazubatsa ape maha. “O ikia zuba tsamysapyrēta.

Ikia zuba wasani tsinakarata ana hi tsinymyrykynaha” — nikaranaha.

Iwa kytsa buburu zuba baze Deus bo nisakibazikiknaha.

<sup>5</sup> Kyze Deus wahoro zubata bo bijoikpe eze ikozo. Anaeze Deus sapy zoksapare niy.

<sup>6</sup> Bijoiikpe iknyktsa sete ahatsa Deus wahoro zubata eze ziponaha. Usta tsyhyry humo petok ziakyri sete ahatsa myitsapyriwytsa zibykyknaha. Sisukarikpu karikpukrëtsa sisukbarazarëtsa hÿ, ouro tahazikwoekaïwy ty tahapaukpuke buruk haïhaï niaha.

<sup>7</sup> Siraratsa sapetoktsa sapetoktsa ahatsa siupurusuktsa hyrity watsa ty sibo nyny niy. Ouro suknihitsa ty niaha. Estuba sirara ispituta, sete sioporosuktsa hyrity watsa ty sete bijoikpe iknyktsa bo nyny niy. Estuba estuba zuba siwatu niy, itsaeze Deus kyriwy ty inaharek duabohotsa tsik hyrity waha. Atahi koikny bakta tu tawahi ispitu, iykyriwy hi siporoktsa eze niy.

<sup>8</sup> Deus wahoro zubata eze zatata inaharek niy. Deus ipunihikrënikita humo zatata tsizubarëna. Ata hi imysapyrënikita anahumo hi zatata zuba iwahoro eze niyzik. Batu aty tohi ba ziksuk, zatata pokso. Bijoiikpe iknyktsa myitsapyriwytsa nasipaparabanahaze iwatsahi kytsa Deus wahoro zubata bo mynapupunaha. Sininikarawy mopykbaze iwaze zatata mohokda.

## 16

*Sioporosuktsa hyritywatsa anaeze Deus iakyriwy duabohotsa tsik waha inaharek.*

<sup>1</sup> Kyze iaksoho opykani ha iwaby, bijoikpe iknyktsa sete ahatsa sibo niy. Deus wahoro zubata ikny niy. Ata hi:

— Tsiksinaha! Mybarawy bo pãotaha! Sioporosuktsa hyrity watsa sete ahatsa Deus ykyriwy

inaharek tsisusunaha! Deus ykyriwy anaha hi sispirikpobyitsa bo suretaha! Asaktsa iharere bo batu h̄y zikaha iwatsahi sibo hi tsiuhikainaha — niy.

<sup>2</sup> Tapara estuba bijoikpe iknykta inaparak. Taoporosuk hyrity wata ezekyty wytyk bo suhikare niy. Atsoko kytsa abazubatsa asaktsa siokpe humo itsikarara naro iwatahaha, asaktsa itsikarara zoknihita iharere bo yh̄y nikaranaha. Asa bo hi siakōrōrōtsa sitsapyrētsa niaha. Mobibibakanaha siakōrōrōtsa humo. Iwa tapara bijoikpe iknykta taoporosuk ezekyty zipukuhik.

<sup>3</sup> Kyze usta bijoikpe iknykta taoporosuk hyritywata ezeky ty buburu zuba bo zipuku. Atsoko pihik siakbatsa spu wa niyzik. Iwatsahi piknutsa pihikyrytsitsa niakbabaiknaha. Botu petoktsa bijoikpe iknyktsa siupurusuktsa ezekyty surehik niaha.

<sup>4</sup> Kyze usta bijoikpe iknykta taoporosuk hyri-tywata ezeky ty zipuku. Pihik zitsiktōtōtōkō. Pupuputsa bo kino niwatihi zipuku. Iwaze ana pihik kino ispu niyzik. Botu harakykbyihi bijoikpe iknyktsa sipurusuktsa ezeky ty sure niaha.

<sup>5</sup> Kyze usta bijoikpe iknykta bo ikozo atahi pihik perykytsa Deus bo nipamykysoko. Iharere iwaby. Atahi:

— Ikia koikny baktatu, tsiziurēnikita. Tsamys-apyrēta tisopyksapyrēta. Simysopyksapybyitsaktsa ahumo simyitsapyrirētsa ana hi wasani my. Aharere humo tisapyrēna.

<sup>6</sup> Asaktsa asohotsitsa, atyryktsa kino niwatihi ziknasibakanaha, sihumo sispu nisoko. Aba ustsaspu mosuze ana hi sihuak — niy.

<sup>7</sup> Kyze iaksoho jokmorēnikia iwezowysapy ikny iwaby — O mypokzitsikitsa, ikia zuba Deus bataba. Apunihikrēnikita ba hawa tohi zasukninaha, simysopyksapybyitsaktsa ahumo simyitsapyritsa ana hi wasani my. Tsasopykziurēta hawa sinini nikaranaha tisapyrēna — niy.

<sup>8</sup> Kyze usta bijoikpe iknykta taporosuk hyrity wata ezeky ty zipuku. Haramwe bete zipuku. Iwatsahi mybarawy ezektsa izo humo niharakoronaha.

<sup>9</sup> Iwatsahi simysopyksapybyitsaktsa izohani humo niharakoronaha. Asaktsa simysapybyitsa ziknakaranaha ba zimoewynaha. Siharerewabymybarētsa. Deus ipunihikrēnikita atahi myitsapyriwytsa mybarawy ezektsa bo mysipehaka. Iwatsa tu simysopyksapybyitsaktsa Deus soho ty batu tyso — ikia tsazuba mynakata — iwa batu tyso. Siharerewabymybarētsa. Deus soho pisapybyrikinaha. Botu siharakyktsitsa zuba iwa bijoikpe iknyktsa sioporosuktsa eze ky ty sure niaha.

<sup>10</sup> Kyze usta bijoikpe iknykta taoporosuk hyrity wata ezeky ty zipuku. Itsikarara dyhywy bete zipuku. Iwatahi isapy bo miwa niyzik. Miwa hiba. Asaktsa iharere bo hyŷ nikaranaha miwa tsahi pyik pyik nikaranaha. Tahamyitsapyri humo tahastiāriktsa nisiboronaha.

<sup>11</sup> Iwatsatu Deus soho zisapybyrikinaha tahamyitsapyri humo. Simysapybyitsa nikaranaha batu tymoewy. Sakōrōrōtsa humo Deus atakta bijoikpe ezekta, isoho pisapybyrikinaha. Botu mytsyhyrytsa wa bijoikpe iknyktsa sioporosuktsa ezeky ty surehik

niaha.

<sup>12</sup> Kyze usta bijoikpe iknykta taoporosuk hyrity wata eze ky ty zipuku. Buburu bo Euperetes inarokota zipukuhik. Iwatahi buburu nitsehebaik. Haramwe sukewy taba mypehatsitsa mozumunahaze siske nikymy. Iwaze pitsikzanaha.

<sup>13</sup> Kyze hyrikoso sapybara harakykbyihi bo iktsa icy. Asaktsa hawa batu simysapy kytsa sihumo mytsaty mykaranaha. Mysimytsatyhykynaha. Hyriketsa watsa niaha. Hyrikoso isapybara estuba hotsoikarazata sake eze izoi. Usta ihyrikoso sapybara itskarara sake eze izoi. Usta Deus sohokotsabyita tu isake eze izoi.

<sup>14</sup> Hyrikoso sapybara harakykbyihi sipehakatsa Satanas. Amo kytsa batu zikaha, astsatu nikaranaha, siwatawyhytsa nikaranaha. Nanabyitaba sihudikhudikwytsa bo niaha. Abazubatsa sipehatsa bo siakzohotsa niaha. Kytsa abazubatsa niwatsoro tsihikiknaha. Iwaze siharere humo kytsa abazubatsa niwatsorokonaha. Deus tuktsa nisisukyrikinaha. Nawa puruze nisisukyrikinahaze Deus zikwyrēnikita myzubahatsa bo nisiwatawyky ba hawa tohi zikzukninaha ana humo hi sihyrinymyrētsa.

<sup>15</sup> Kiristu tihi:

– Wabytaha! Uta mozumuze, kytsa katy pery ahabyi zeka mozumu itsyhyryboata wata. Kytsa papatu mozumu. Asaktsa pikperykynahatsaktsa mozumuze asahi sakurētsa. Kytsa tahasuk pipokzitsikinaha zeka asa watsa maha. Ba tahasikpyby ziyknaha – niy. Iwa Kiristu niy.

16 Kyze hyrikoso sapybara harakykbyihitsa humo kytsa pehatsitsa inakypyknaha, sisapy bo inasioktyhyryknaha. Anaenze Aremakedō inarokoha. Iwa Ebereu harere my. Aba usta tsyhyry humo ziakyri bijoikpe iknykta sioporosuktsa hyrity watsa eze ky ty zipuku.

17 Iwaze bijoikpe iknyktsa ziharawybabata taporosuk hyrity wata ezeky ty jobo to zipuku. Iaksoho Deus wahoro zuba idyhywy ikny opykani kakaik niy.

– Niwazuba – niy.

18 Iwa niyze siaksoho nitotoko nahaze ky wa ziwabynaha. Wytyk nityhyrykyk tu nitydydykyk tu niwahaka batu mynyhy. Kytsa tahapetu nikaranaha – Isuknihybyze wytyk nawa batu aha. Aba zuba niy – nikaranaha.

19 Babironija inarokoha sihudikhudikwy abazubaha inakarakbaik nataba nataba aha inakarakbaik. Utsa hudikhudikwy abazubaha Deus harere humo zipykba. Deus Babironija ezektsa nisiperyky tahamysapybyi pimoewy naha hi, ziperyky. Asaktsa imysapybara ty ka batu ity moewy iwatahi takyriwy sibo zipeha, iwaze sihudikhudikwy inakarakbaik. Sinini ykarawy bo nikaranaha. Deus takyriwy duabohotsa tsik waha niy. Duabohotsa tsik batu pihik ty tsakykyha iwaha Deus takyriwy iwa h̄y my.

20 Tsikzikdihitsa sizubarētsa nihokdanaha. Hara jobonikia kino niwatihi nihokdabaik.

21 Harahareziktsa bijoikpe ikny inatsukurunaha. Sitsakyrikrētsa. Wastuhu kuarēta kiros itsakyzik. Kytsa bete inatsukurunaha.

Sinini nikaranahaze Deus zisapybyrikinaha. Siskyryziubyitsa tu Deus soho zisapybyrikinaha, harahareziktsa bijoikpe ikny inatsukurunaha iwatsahi Deus soho zisapybyrikinaha. Iwa hÿ.

## 17

*Wytyk sasabyitsa iakparawytatsa itsikarara ahatsa.*

<sup>1</sup> Iwaze estuba situkta bijoikpe iknykta sete ahatsa tukta kape nikara. Taoporosuk ty wabe ahata kabo izumu. Kape niy:

– Pany! Uta Deus sihudikhudikwy humo my-sinininaha humo abo piwatawy – niy. Si-hudikhudikwy buburu sak ezeky niy. Ana Ezektsa simysapybyitsa mykaranaha imysapybara zuba mynazihikiknaha. Asahi wytyk watatsa atatsahi kytsa humo mozuruku. Atatsa makutsa iakparawytatsa sizubarëtsa zikzipyrirykyknaha sihudikhudikwy ezektsa deusbyitsa tsizubarëtsa siakparawy, – O deustsa babatsa – mytsaty ahabyitsa mykaranaha. Iwatahi sihudikhudikwy Deus myzipyk.

<sup>2</sup> Kytsa sizubarëtsa pehakatsa atatsa nisimyiki, atatsa humo imysapybara mynazihikiknaha. Kytsa abazubatsa niwatihi atatsa humo pisapybyikiknaha. Sispirikpobyitsa usts bo tsõĩ hyrity waka siopuwy ty nyny maha, iwatsahi sityryknymyryhybyitsa nikaranaha atsatyty atatsa nisimiyiky. Atatsa watsa sihudikhudikwy ezektsa kytsa Deus bo batu yhÿ mykaranaha iwa nisimiyynaha.

<sup>3</sup> Iwatahi Deus hyrikoso kasapy iziakse, iwaze bijoikpe iknykta jerukbara bo zikoktyhyryk.

Anaeze wytyk bo ikozo. Atatsa itsikarara itsaririhitababata bete nidyhyky iny. Inury humo nanabyi humo imysapybara iwatahata. Deus soho bara tu iwatahaha. Sete harektsa niy. Iharanitsa humo kino niwatihi mytsyhyrytsa nesepyk niy.

<sup>4</sup> Wytyk suk tsaririhitababata ty korobyk niy. Inapiritsa ouro hi sikarikpu karikpukrētsa niy. Harahare zipyryktsa sipokzitsiarētsa, peroratsa kino niwatihi sipokzitsiarētsa. Atatsa itsipykeze ioporosuk zibykyk, anaeze isapybara hi inaharek. Atatsahi ziknasisapybyrikitatsa ana humo hi ioporosuk inaharek.

<sup>5</sup> Iokpe humo iwatahahatatsa niy. Inaro iwataha batu aty tohi inaro humo ihyrinymyry. Inaro hi:

— Atatsa katsa simysapybyiza je iakparawy Babirō watatsa. Atatsa hi kytsa nisimiy-wyikiktatsa. Iwaze sasabyitsa simysapybyitsa mykaranaha — niy. Anahi iokpe humo ziwatahaka.

<sup>6</sup> Atatsa hi Deus tyryktsa spu zikuku iwata-sahi nityryknymyryhybyi, tsōsī humo hi, tsiy-dikrētatsa Deus tyryktsa abazubatsa siakbatsa, asaktsa Sesus harere bo hyŷ mykaranaha iwata-sahi ihumo sispirikporētsa asahi nisiba.

Atatsa bo iktsa ikyze kapybyrēta ikyzik.

<sup>7</sup> Bijoikpe iknykta kape niy:

— Amo skaraba tsimykozotoktoko niy. Ahyrinymyrybyita tu sa tsapybyrēta. Abaka amy bo iktsa tsiky abo motsasoziu. Wytyk itsikarara bete nidyhyky sete iharektsa mytsyhyrytsa



nesepyk iharanitsa iwa sisoho abo motsasoziu — niy.

<sup>8</sup> Itsikarara tsinyta tapara ka ispitu. Abaka batu. Aibani tawahi nira ihokepomobara ikny myzoik iwaze sinini ykarawy bo mykara. Asaktsa tapara kino Deus papeu humo sinaro watahabyitsa itsikarara pokso sipybyrëtsa. Nanabyizuknihybyize Deus papeu humo botu ziwataha, kytsa Deus tuk tahawahi mynapykyryknaha sinaro Deus papeu humo botu ziwatahaka. Asa hi Deus papeu humo sinaro watahabyitsa itsikarara pokso sipybyrëtsa nikaranaha. Taparaka itsikarara ispitu abaka mohokda. Aibani zuba mynatakahazo ana humo hi sipybyrëtsa:

<sup>9</sup> Atakta myhyrinymyrywy baba zuba amy iktsa tsiky aha humo tsihyrinymyrëta. Atakta pykyhytu mytsatyziyu mykara. Harektsa itsikarara sete, hara jobonikia sete maha. Atatsakatsa haratsa bete nidyhyky. Iharektsa mypehakatsa watsa maha. Myhudikhudikwy mypehakatsa watsa iharektsa maha.

<sup>10</sup> Sipehakatsa mytsyhyry wa botu myokzanaha. Usta tsyhyry humo ziakyri maha tawatahi mysipehaka. Iwaze ustakta abahi batu itykaha, iwaze natakahaze kino ba iwatatu zikapykyryk atsoko mohokda, iokboha zuba mysipeha.

<sup>11</sup> Itsikarara tapara ispitu ziknapykyryta tu abaka batu botu nira nihokda, ata hi ipehatsa, sete pehatsa watsa, ata hi sinini ykarawy bo my.

<sup>12</sup> Iharanitsa mytsyhyrytsa watsa tsiksiny-nahatsa hi. Asa hi mypehakatsa moziknaha. Aiba zuba sihudikhudikwy mysipehanaha

simypehatsa mytsyhyrytsa watsa destsa mykaranaha. Iwatsatu simypehawy aba zuba itsikarara humo hi mysipehakanaha, jokboha zuba uma ora zuba mysipehanaha.

<sup>13</sup> Asaktsa tahatuk yhÿ mykaranaha, estuba zuba wata mytsaty mykaranaha. Iwaze tahamyrawy ty itsikarara bo nyny maha. Iwatsahi iharere bo yhÿ mykaranaha.

<sup>14</sup> Asaktsa hozipyrykza tsibik wata ibo mowat-sorokonaha pibeze tsihikiknaha. Atahi atakta abazubata sihumo mytasoho. Atakta hozipyrykza tsibik wata sizikwy nepyk. Hozipyrykza tsibik wata ituktsa, ziwatawynahatsa, asahi iharere bo hyÿ mykaranaha iwa situk sipehatsa bo mowat-sorokonaha. Hozipyrykza tsibik tsizikwyrëta tu ba hawa tohi zikzukninaha simyrawy zepykba iwatahi taharere sotsatuk iwaze ituk zinymyrykynahatsa tuk nasepykwy. Atahi abazubata my.

<sup>15</sup> Bijoikpe iknykta kape niyzo:

– Buburu zuba tsinynaha. Atatsahi wytyk imysapybyiki tatsa, makutsa iakparawykytatsa, atatsa hi buburu sak eze nidyhykytatsa. Asahi aparakbaha meky watu sihareretsa. Nanabyitaba sihudikhudikwytsa – iwa.

<sup>16</sup> Iharanitsa mytsyhyrytsa watsa tsiksinynahatsa itsikarara tuk wytyk imysapybyikitatsa humo tahakyrikinaha. Inamy ty piaksebaiknaha inury bo iktsa maha isuk kino pibobobaiknaha isukbyi tatsa pereknaha itsani piboronaha motare naha ka izo bo pioktsoktsoknaha iwaze mokorobaik.

<sup>17</sup> Deus humo mypehawy mykaranaha. Atatsa pibezenahaze ana hi Deus nizihikik. Sipehakatsa

asaktsa tahapetu sisopyk:

— Myzikwy itsikarara bo nyny tsimaha — niaha. Hawa Deus nizihikik ana hi nikaranaha, tubabatu botu nipamykyso iharere bo yhy mykaranaha.

<sup>18</sup> — Atatsa wytyk tsinynahatatsa katsa kytsa ziknasisapybyriki atatsa hi sihudikhudikwy aba zuba hyrity waha my, sihudikhudikwy abazubatsa mypehakatsa atatsa siakparawy. Atatsa harere bo yhy mykaranaha — niy. Iwa bijoikpe iknykta niy, hawa ha iny nahaka kabo nitsasoz-iuku.

## 18

### *Babironija naktsihipetotokbaiknaha.*

<sup>1</sup> Iwaze usta bijoikpe iknykta bo ikozozo. Bijoiikpe ikny inasikik. Tsipunihikrēta. Tsimys-apyrēta tu okoroze ky waha tuk inasik mybarawy bo zihyrizikaroba.

<sup>2</sup> Iaksoho opykani kazi nikara. Atahi:

— Sihudikhudikwy Babirō abazubaha inarokoha hudikhudikwy inakarakbaik. Nepyk. Batu aty tohi isapy bo ba zikzumuzo. Hyrikoso sapybara hyrikosotsa zuba niwatihi sisapy mozik. Asaktsa sisarakatsa kytsa ba ziksiboronaha simytsazorētsa ahatsa sisapy moziknaha.

<sup>3</sup> Babironija ezektsa kytsa abazubatsa sipehakatsa nisimiywynaha. Batu imysapybara nisiakpybanaha. Hawa sakmyitsa kytsa sispirikpobyitsa ustsya kytsa bo tsōsī siukpuwy ty sibo nyny maha, iwaze sityryknymyryhybyitsa moziknaha atsatyty isapy ezektsa nisimiywyknaha. Sipehakatsa namy tsizubarēna ziaksenaha, amy bo iktsa niaha atsatu nizihikiknaha. Amy

ty nizihiknaha atsa tu ziaksenaha. Iwatsahi sinamyrētsa niyziknaha – niy.

<sup>4</sup> Iwaze usta iaksoho bijoikpe ikny iwaby nawa nikara.

Sihudikhudikwy ezeka tuparakik katyryktsa ekze tuparaknaha

ba imysapybara ty taha

pahasininiwy nahaze kino ba situk tsimaha,

iwa tsimaha zeka ba situk sinini tsimaha.

<sup>5</sup> Sihudikhudikwy ezektsa simysapybyri izozoha wa ziyzik.

Bijoikpe bo zumu. Imysapybyri atatsa tuk nikaranaha ana humo hi atatsa tuk sinini mykaranaha.

Deus humo ba zikspiriktsokda kytsa tsiksibakanaha humo.

<sup>6</sup> Iwaze ikiahatsa kino ahabo nyny nikaranaha jokboatu iwatsahi ikiahatsaktsa abazuba ibo nyny tsimaha.

Tsipihuak nahaze kino atatsa ahabo nyny nikaranaha humo ibo tsipiharapobete-henaha.

Ahaoporosok ty kino tyharek babatu taha.

Ahabo tamyrawy nyny nikaranaha ka tsi-harapobete-henaha.

<sup>7</sup> Tapara atatsahi:

– Ikza kaziurētatsa.

Kanamyrētsa tsipokzitsarēna. Kanamyrētatsa my hỹ – niy.

Deus ibo isininiwyty aba zuba taha iwaze isukat-sihik humo ka.

Tapara – Kanamyrētatsa, kakurētatsa nikara.

Tapetu ziknakara. Tapetu zuba isopyk iwa zik-nakara.

Sasabyitsa pehatsa watatsa modyhyky  
 ikza katsa haramukukabyitatsa ba sinini  
 zikyzo.

<sup>8</sup> Ana humo hi asta okoroze tu zuba sinini mykara.  
 Tsimyitsapyrētatsa. Tsiaraparētatsa.  
 Tisukatsihikrētatsa. Sinini ykarawy bo my. Atatsa  
 izo bo myharakoroba – niy. Iwa hỹ. –  
 Mypokzitsikitsa humo atahi Deus zubata izik-  
 wyrēnikita tu ba hawa tohi zikaha.

Atakta ihuak ty atatsa bo nyny my – niy.  
 Iwa iaksoho bijoikpe ikny kape niy.

<sup>9</sup> Babirõ mokorobaze mybarawy ezektsa pe-  
 hakatsa ihumo mopukarakanaha. Mopuziuku-  
 naha. Asaktsa ustsá mysimiywykynaha, taha bo  
 zuba mytsaty nikaranaha asaktsa Babirõ zatata  
 bo iktsa mahaze mopuziukunaha.

<sup>10</sup> Tahapybyspykēryktsa tu sihudikhudikwy  
 mokorokonaha bo mokozokonaha. Nokponi tu  
 morikto rikttohokonaha ipokso iwatahi:

– O Babironija ikia sihudikhudikwy abazubaha  
 myhudikhudikwy zikwyrēnikia iwaha tu Deus  
 humo atsoko uma ora eze zuba botu sinini  
 tsimykara – mykaranaha.

<sup>11-12</sup> Iwaze mynamy huakaktsitsa mybarawy  
 ezektsa kino kaka maha, iwaze hi mopuziuku-  
 naha ipokzi iwa zeka ba aty tohi mynamy zi-  
 huak mykaranaha. Mytyryzikihi humo ja ba zi-  
 huaknaha mykaranaha. Ba aty tohi my ouro  
 ty parata ty harahareziktsa sipokzitsianikitsa ba  
 kōpara zikaha. Iwaze perora bara humo kino  
 ba, usa panu jakarabara humo kino ba panu  
 tsaririha humo zityryzikiknaha humo kino ba,  
 hozipyrykza zityryzikihi humo kino ba anahi

tsaririha ba nanabyi humo kino ba, nanabyi hwitsa suknihi humo kino ba hwi aba zubata humo kino ba pero ty zuknihita kino ba barõse humo kino niwatihi batu ba.

<sup>13</sup> Batu aty tohi mynamy disahawy ty kanera tsakykywy humo kino ba jokmorēnikia miha ba zihuak naha. Duabohotsa tsik, itutawy tiriko upa humo iwaze tirikotsa ziktsa humo kino ba pikuzatsa hozipyrykzatsa, wytykburuktsa kytsa tarabajaziu mykaranahatsa asahi okyrysaro humo sibo nyny aha hokbyitsa kytsa ahanamy watsa ba asaktsa ba zikwaknaha.

<sup>14</sup> Kytsa sinamy ziaksekenahatsa Babirõ ezektsa pe maha:

— Isapyrēnikia ty tsimyzihikiknaha hana bo ja. Ahanamy nihokdaba. Taparaka ahanamy tsizubarēna ahasapyrētsa hỹ. Abaka nepykbaik, ahanamy tawahi nihokdaba. Ba ziaksezonaha — maha.

<sup>15</sup> Ziaksekenahatsa nokponi tu niriktorikto-hokonaha zatata bo iktsa nikaranaha. Asaktsa ihumo sinamyrētsa niyziknaha. Sipybyrētsa nipuziukunaha. — Katsa kino niwatihi tsimyharakorobanaha kok — nikaranaha. Iwaze nipuziukunaha.

<sup>16</sup> Asa hi:

— Sihudikhudikwy ezektsa simypokzitsiuby-itsa maha. Sihumo mysukatsihikrētsa. Tapara amy tsipokzitsarēna ty zuba korobyk nikaranaha. Sisuk ty tsaririta niy. Hozipyrykza zi sisuk tisapyēna iwaze ustsasibo iktsa niaha. Sisapyrētsa ty ouro ty, harahare zipyryktsa tsipokzitsarēna ty peroratsa ty iwa tahasuk humo ziknakaranaha.

17 Iwatatsahi uma ora eze zuba sinamy tsizubarēna nepykbaik. Tsarahatsa sibudurēnikitsa perytsitsa sitsumuēhītsitsa jokeze niukurunahatsa buburu zuba buruk niukurunaha – iwatsahi nokponi tu niriktoriktohokonaha.

18 Izatata bo iktsa nikaranahaze:

– Myhudikhudikwy tisapyrēna. Usta hudikhudikwy batu nawaka, tisapyrēna – niaha. Iwa kazi nikaranaha.

19 Tahasopyk ty wytyk tazyty taharatōtōkōnaha, wytyk tazy ty tutu nikaranahaze sisukatsihikrētsa nisiwatawy. Nipuziukunahaze:

– O sihudikhudikwy ezektsa simypokzitsiuby-itsa. Tapara sinamyrētsa. Tsarahatsa budutsa perytsitsa sihumo sinamyrētsa niyziknaha, Babirō ezektsa sinamyrētsa tu siokyrysaro sibo zihuakikiknaha. Abaka nihokda. Uma ora zuba hana bo ja. Tawahi nepykba – nikaranaha.

20 – O bijoikpe ezektsa ahakurētsaktsa! Deus tyryktsa, Deus sohokotsa, Deus ykzohotsa tsasohokotsa iwatsa ahakurētsaktsa! Deus humo sihudikhudikwy ezektsa sinini mykaranaha. Iharere humo sinini mykaranaha. Asaktsa zahasukyriekiknaha abaka Deus ihuak ty sibo nyny my. Siakyriukrētsa abaka ihuak humo sinini ykarawy bo maha – my. Iwa bijoikpe iknykta kabo nitsasoziuku.

21 Kyze bijoikpe iknykta tsipaikrēta harahare zuba zibykyk. Harahare zuba buburu zuba bo nipapykik. Tu niy:

– Ūta harahare ikpapykik nahawa Deus Babirō hudikhudikwy zipyk. Anahudikhudikwy bo ba zik nakozorezo, tawahi mohokda.

<sup>22</sup> Anaeze batu aty tohi zikpamykyzu. Si-tanatanawytsa bereketsa siokepepehetsa iwatsa ba ziksiwabyzonaha. Atakta isapyrēnikiatsa ty nizukniki ba ziknakozorezo. Wytykyryk wanatsitsa mysiwazikinaha ba ziksiwabyzonaha.

<sup>23</sup> Anaeze rika ba zinyntaha. Kytsa taha-sukzanaha humo sakurētsa, tahamyikahanahaze ba zinyzonaha. Sinamy ziaksekenahatsa sinamyrētsa niyziknaha. Kytsa humo mybarapetu nikaranaha iwatsahi sinamyrētsa ziknakaranaha. Abaka batu, sinamy nihokda. Nepykbaik – niy.

<sup>24</sup> Babironija abazubaha sihudikhudikwy eze Deus tyryktsa spu humo zinykynaha iwahahi izuhaha Deus sohokotsitsa humo hi mybarawy ezektsa Deus tyryktsa iwatsa nisibakanaha iwatahi Deus sinini ykarawy bo nisipeha. Anaeze tahawahi mynapykyryknaha.

## 19

<sup>1</sup> Iwaze iaksoho opykani myzubaha iaksoho waha bijoikpe eze ky iwabyky nawa nikaranaha:

– O Deus zuba imysapyrēnikita tsimahakta! Atahi isopykziurēnikita. Itse babata mymyoktyhyrykta. Atahi zikwyrēnikita ba hawa tohi zikzukninaha. Tsimysapyrēta.

<sup>2</sup> Kytsa iharere bo batu hỹ zikahabyitsa ahatsa hi batu sispirikpo simyitsapyritsa moziknaha. Iharere humo sinini mykaranaha. Anaty hi wasani my. Wytyk kytsa bo hua ziknakara atatsa hi mybarawy ezektsa nisimyiwyky atatsa humo simysapybyitsa nikaranaha. Deus atatsa humo tatsapusare niy. Sinini nikara atatsa hi Deus



tsumuēhītsitsa nisibaik iwatahi tatsapusare niy ana ty hi wasani my – nikaranaha.

<sup>3</sup> Iwaze nisakibazikikzonaha:

– O Deus zuba imysapyrēnikita tsimahakta! Hawa zatata jobo mydoko, iwa Babirō ezektsa sinini mynakaranaha, siwahi sinini ykarawy bo maha – nikaranaha.

<sup>4</sup> Kyze abazubatsa yhỹ nikaranaha. Taparaktsa taypykyryknahatsa wīte kwatero, sapetoktsa sapetoktsa siraratsa sispitutsa kino niwatihi Deus dyhywy okeryk tahaekaratsa humo puruk puruk nikaranaha. Asa hi:

– O ikia zuba tsamysapyrēta. Ikia humo mykurētsa – nikaranaha.

*Hozipyrykza tsibik hyritywata sukzawy soho.*

<sup>5</sup> Iwaze myksoho waha Deus dyhywy ikny iwaby nawa nikara. – Deus zuba imysapyrēnikita tsimahaktsa! Sitsumuēhītsitsa sizubarētsa bo, kytsa nanabyitaba sihudikhudikwy ezektsa bo niwatihi my. Abazubatsa iharere piwabytoktonaha, myhyrikwanitsa myhyrizikwabyitsa niy kino niwatihi piwabytoktokonaha. Asaktsa:

“O Deus ikia zuba tsamysapyrēta tahaktsa!” – niy.

<sup>6</sup> Iwaze sizubarētsa yksoho opykani ha iwabyky. Ihiridawy akpyri waha iwabyky. Atsawatu hyritsik bipyri waha nitotoko nawa hi iwaby. Asahi:

– O Deus ikia zuba mypokzitsikitsa. Abaka mybarawy ezektsa abazubatsa pokzitsikitsa tsi-mozik. Zikwyrēnikita ba hawa tohi zikzukninaha. Kytsa abazubatsa aharere bo hyỹ mykaranaha. Ahumo zuba tsimyspirikpokonaha ikia tsamysapyrēta tsimykaranaha.

<sup>7</sup> Mykurëtsa tsikykaranaha! Mydikrëtsa tsikyziknaha! Atakta hozipyrykza tsibik wata nihyrikosokda abaka tasukza iwatsahi Deus bo tsimysakibaziknahaktsa! “Ikia zuba tsamysapyrënikita” tsimaha. Tapytsatatsa botu tazozikba.

<sup>8</sup> Atatsa nikymy.

Isuk tsibarazarëna ty ibo botu nyny niy. Isuk jakarabara. Tsiziurëna ziksyknahabikia, tsikaripukaripukrëna. Atatsa isuk tisapyëna hawa Deus tyryktsa amy ty tisapyrëna mynakaranaha ana soho hi piwatawyky – niy.

<sup>9</sup> Iwaze bjoikpe iknykta kape niy:

– Na tsiwatahakta! Asaktsa hozipyrykza tsibik suzwawy waha zahakzokonahaktsaktsa ahakuhuktsa. Iwaze bjoikpe iknykta niyzo nawa Deus harere baba – kape niy.

<sup>10</sup> Iwaze uta kaekaratsa iokeryk puruk puruk iky. Iwaze bjoikpe iknykta kape niy:

– Awatu tykta utakta ikiatukta ahatukytsa tukta aha iwaze sasabyitsa wasania ty zuba mynakaranahatsa Deus wasaniha Sesus soho nitaso, Deus mykara nahatsa kytsa nisiwatawy.

Abaka Deus sohokotsa atsatu motsasokonaha, Deus harere baba humo – niy. Iwa Deus bjoikpe iknykta kabo nitasoziuku.

*Maku pikuzza ibarazabaharëta bete nidyhyky.*

<sup>11</sup> Iwaze bjoikpe sakpare aha iny. Pikuzza tsibarazarëta iny. Amata ibete nidyhyky petok inarokota niy. Estubaka inaro – Deus harere bo hyÿ mynakarata usa inaro ka “Wasapeha ty zuba mynatsasokota” – my. Atahi amy ty wasani sispirikpobyitsa pe mykara. Mysisininiwyze

wasani my. Niwatsohorokoze sakyriukrënikitsa tuk wasani my. Tisopyksapyrëta.

<sup>12</sup> Ihyriziktsa izo hyrity watsa tsihizikuarëtsa. Sitsorikzubarëta ouro zuba niaha. Sipehakatsa tsorik wata niaha. Iokpe humo inaro iwatahaha. Atazuba inaro humo tsihyrinymyrëta ustsaktsa batu sihyrinymyryhy sihumo tsihokdaharëna.

<sup>13</sup> Iakpyzazawy ispubaharëta, kytsa ipe sisopyk:  
– Deus harere – mynakaranaha.

<sup>14</sup> Iapik sodadutsa bijoikpe iknyktsa nikaranaha. Asaktsa pikuzatsa sibarazarëtsa bete tahadyhydyhykynaha. Sisukbarazarëtsa. Siziurëtsa.

<sup>15</sup> Isake ikny sokorotsapu zeze wata niy. Itsaribahata niy. Ata sokorotsapu zeze tuk kytsa abazubatsa iharere bo batu hÿ niaha sispirikpobyitsa tu sizikwy nepykbaik. Sipokzitsikitsa mozik, itsipyk eze tanoro wata my peho hi zibykyk, ana pokso hi sispirikpobyitsa iharere bo hyÿ mykaranaha, sipehakatsa niyzik. Deus zikwyrënikita takyriki simyharerewehanikitsa humo iwatsahi mysisininiwyky. Hawa duabohotsa tsik pyik pyik tsimykaranaha iwa sispu tsizubarëna.

<sup>16</sup> Iakpyzazawy humo inaro iwatahaha ihyry humo kino niwatihi inaro ziwatahaka. Petok inarohota. Estubaka – Kytsa pehatsa abazubata – inarokota. Usta kino – Kytsa abazubatsa pokz-itsikitsa – inarokota. Iwa inaro petok.

<sup>17</sup> Iwaze bijoikpe iknykta inyzo. Haramwe bete niriktoho. Kaka niy. Sisarakatsa jo bo nitsat-sakanahatsa bo opykani kakaik niy:

– Panytynaha Deus myikaha bo tynazuzuk-naha.

<sup>18</sup> Sihudikhudikwytsa pehatsitsa ni tsiboronaha! Sodadutsa sykzotsitsani tsiboronaha! Sodadutsani, pikuzatsani, tahatsihitsani, abazubatsani tsiboronaha! Bipyritsani kytsa tarabajaziu nikaranaha okyryrsaro tyhyrykbyitsani, myhyrizikwanikitsani, myhyrizikwanibyitsani iwatsa tsiboronaha – niy. Iwa sisarakatsa pe niy.

<sup>19</sup> Iwaze itsikarara bo iktsa iky. Mybarawy ezeaktsa pehakatsa situk inakypykbanaha, asaktsa siharere bo yhỹ nikaranaha, abazubatsa niwatsorokonaha bo inakypykbanaha. Atakta pikuzatsa bete nidyhyky ituktsa ahatsa sibo hi niwatsorokonaha.

<sup>20</sup> Atakta pikuzatsa bete ziknadyhykyta itsikarara tsipa humo ziokyhyryk. Iwaze Deus sohoko tsa byitatu ata kino niwatihi itsipa humo ziokyhyryk. Atakta itsikarara zikwy humo amy ty kytsa batu zikaha, atahi nikara, itsikarara zikwy humo. Ana humo hi kytsa itsikarara naro siokpe humo ziwatahaka iharere bo yhỹ nikaranaha. Sispirikpobyitsa tu mybarapetu nikara batu sinymyryhy. Asaktsa itsikarara izoknikita pe – Ikiya tsamysapyrēta – nikaranaha. Iwatsahi petoktsa, itsikararatsa, estubaka Deus sohokotsabyitatu usta itsikarara niwatihi ahatsa sitsipatsa nisioktyhyrykze izo zuba bo nisioktsokik, ēsopire tazy inapok anaeze mokorobakanaha. Sispitsa tu izo zuba bo nisioktsokik anaeze tahawahi mynapykyryknaha.

<sup>21</sup> Atakta pikuzza tsibarazarêta bete nidyhyky itsikarara apiktsa nisiba, sokorotsapu zeze hyrity wa ta tasake burukta ty nisibaik. Sisarakatsa sini ziborobaiknaha. Sisorokrêtsa niyziknaha.

## 20

### *Miu mytyk tseheze aibani zuba.*

<sup>1</sup> Iwaze bijoikpe iknykta tyk bo inasikta in-  
yzo tatsipykeze myhyrizikpyryrikwytsa ty wabe  
ahata iny. Ihokezuba myhyrizikpyryrikwytsa ty  
hi zoksapare nikara iwaze karikutsitsiwytsa tit-  
sakyrikrêtsa ty niwatihi inasibykyk.

<sup>2</sup> Atahi hotsoikarazata ziaqwarabaik, atakta  
hyrikoso sapybara perytsa sipehatsa. Satanas  
inarokota. Iwa tahi miu anos mytyktseheze ziaq-  
warahata.

<sup>3</sup> Iwatahi bijoikpe iknykta Deus tsumuêhîtsa Di-  
abo iokezubakara bo inapapykik. Zihukbohik  
iwaze zitsykykik niy, nawaze mybarawy ezek-  
tsa ba ziksispihikbata. Miu anos piharamuzetu  
pisatsukzonaha. Iwaze kino iokboha kyrituktu  
mopykyk.

<sup>4</sup> Atsoko wastuhutsa idyhywytsa bo ikozo,  
sibete nidyhykynahatsaktsa Deus zikwy tuk  
nikaranaha Deus hi sibo nyny niy. Iwazeka  
tapara niakbakanahatsa hyrizikaratsa kino  
niwatihi asa hi Sesus harere nitsasoziukunahatsa  
hi nisibanaha. Deus harere humo ahatsahi  
nikaranaha niwata iwatsahi itsikarara okeryk  
tahaekaratsa ty batu puruk puruk zikaha  
ihyrikosotsa humo kino niwatihi batu zikaha,  
iwatahawy humo kino batu tahaharek humo  
iwaze tahatsyhyrysukpe humo batu aha

iwa nikaranaha tsahi sispitu. Aba Sesus tuk mynapykyknaha. Asahi ituk miu anos mytyktseheze sipehatsa moziknaha.

<sup>5</sup> Kytsa tapara batu inahyrizikponaha. Aiba zuba Deus ustsya kytsa botu niakbanaha mynasyhyrizikpo tsizubarēna mytyktseheze miu anos piharamunahaze iwaze ustsya kytsa mynasyhyrizikponaha.

<sup>6</sup> Asaktsa tapara Deus inasyhyrizikpowy sakurētsa moziknaha. Katsaktsa isapyrēnikia ty tsimaha zeka mykurētsa tsumoziknaha anawatsa sakurētsa mynakaranaha. Asaktsa izo bo batu isty tsok. Tubabatu kytsa Deus wahoro zubata eze ziknapamykysokonahaktsa siwatsa moziknaha. Asaktsa Kiristu tsumuēhītsitsitsa ituk kytsa mysipehakanaha, miu anos mytyktseheze mysipehakanaha.

### *Satanas zikwy nepykba.*

<sup>7</sup> Iwaze miu anos ziharamuze Satanasy tsokezubarēna eze izohik. Iakwarawytsa ty satsuk niyze izohik.

<sup>8</sup> Izoize kytsa abazubatsa pe my, sibo mybarapetu mynakara. Nanabyitaba kytsa bo my. Sispirikpobyitsa pehakatsa, Kok inarokota, Makok bo kino niwatihi mybarawy ezektsa bo mybarapetu mynakara. Parakbaha ihumo mynapykyk mowatsorokonaha bo mynakapykyknaha. Abazubatsa mynakykpykyknaha nimyra waha sizubarētsa hỹ ba ziktsasonaha tsihokdaharēna. Sesus tuktsa bo mowatsorokonaha.

<sup>9</sup> Sispirikpobyitsa nanabyitaba maha. Deus tyryktsa mynasiokehyrynaha mysiba tsihikiknaha. Deus hudikhudikwy myzihaszawynaha, ana hudikhudikwy iakparawy, ana buruk myzihaszawynaha, ihudikhudikwy ezektsa mysiba tsihikiknaha. Atsoko Deus bijoikpe ikny sispirikpobyitsa bo izo nazipik. Asaktsa Satanas harere bo hyŷ mykaranaha, asa bo hi izo nazipik iwatsahi mysiba.

<sup>10</sup> Kyze Satanas hyrikoso sapybara pehakatsa izo bo tapapykwy. Pihikzotsabyri wata anaeze ěsopire tazy mokorobaka, ba zikpyk. Tapara it-sikarara ata kino niwatihi Deus sohokotsa byitatu izo bo zuba nisioktsokik. Anaeze sinini mynakaranaha, unata, okoroze anaeze sinini mynakaranaha. Ba zikpyk.

*Siakbatsa Deus okeryk natakahanaha.*

<sup>11</sup> Iwaze idyhywy puětsikbyita ibarazaharěta iny. Ibete nidyhyky tabo iktsa iky. Mybarawy, bijoikpe aha iokze niwakik iwa. Batu isty nyzo.

<sup>12</sup> Iwaze niakbakanahatsa kino iksinyky myhyrizikwytsa iwaze myhyrizikwybyitsa ahatsa kino niwatihi asa kino iokeryk niriktoriktohokonaha idyhywy okeryk papeu iwatahaha ty zoksapare niaha. Iwaze usa kino nizapare naha Deus tyryktsa narotsa iwatahaha hawa mybarawy eze zikzurukunaha hawa papeu humo ziwatahakanaha hi nikara. Anapapeu iwatahaha zinyze iwaze ihuak ty estuba estuba zuba siwatu sibo nyny niy.

<sup>13</sup> Kytsa buburu zuba tahabakanahatsa kino niwatihi idyhywy okeryk natakahanaha. Asaktsa

mybarawy eze niakbakaranahatsa idyhywy okeryk natakahakanaha. Asaktsa siperykywy kino niwatihi idyhywy okeryk natakahanaha. Abazubatsa iokeryk natakahakanaha. Hawa mybarawy eze zikzurukunaha ana humo hi ihuak ty Deus sibo nyny niy.

<sup>14</sup> Iwaze Deus ihyrikosokdawy pihikzotsabyri bo ziochtsokik. Niakbanahatsa sapy ziperykynaha kino niwatihi anaeze nisiparahik. Anaeze istry tu nikara, tahawahi nikorokonaha. Anaeze niakbanahatsa simysapybyitsaktsa mybarazonaha.

<sup>15</sup> Asaktsa sinaro Deus papeu humo batu tywataha iwatsahi izo bo zuba nisioktsotsokik. Asaktsa izo bo pihikzotsabyri hyrity waha bo tahasapynaha nisiparahik. Iwa hÿ.

## 21

### *Bijoikpe ezytyk mybarawy ezytyk aha mozik.*

<sup>1</sup> Iwaze bijoikpe ezytyk, mybarawy ezytyk aha bo iktsa iky. Bijoikpe mybarawy aha iwa tapara Deus nizukni botu nihokda. Buburu zuba kino nihokda.

<sup>2</sup> Deus hudikhudikwy Serusarêhe ezytyk iny niapykyk. Bijoikpe ikny inasik. Tisapyrêna. Tapytsatatsa watatsa tsiziurêtatsa maku atatsa mozhikik piakse tsihikik. Anawa Deus hudikhudikwy ezytyk tisapyrêna niyzik.

<sup>3</sup> Iwaze opykani iaksoho idyhywy ikny iwaby. Atahi:

— Abaka Deus hudikhudikwy kytsa tuk mynapykyryk iwatsahi ityryktsa moziknaha atahi Deus babata iwatahi situk mynapykyk.



<sup>4</sup>Atahi tsimopuziukunahaze mymyhyritsikwiki iwazeka ba zikykbazonaha. Kytsa ba ziksukatsihik. Ba zikzumuzo ba sininizo zikaha. Mymyitsapyribyitsa tsimoziknaha mykurētsa tsimykaranaha. Katsa ba zikpuzonaha. Ana hi mopykba. Ibykyka mohokdaba.

<sup>5</sup>Atahi tadyhywy bete tadyhyta atahi:

“Abaka uta zuba ezytyk mozoknizo”.

Kape niyzo:

– Na tsiwataha naka myharere wasaniha myharere baba motsasokonaha ka atsatyty mykara.

<sup>6</sup>– Utakta koikny bakta tu, nanabyi suknihibyize tatu. Mybarawy mopykbaze kino kaspitu. Botu iky. Aty iarapuruk zeka ibo nyny my. Pihik pupuputsa iknykyty ibo nyny my, ana humo hi ahaspitu tsimoziknaha.

<sup>7</sup>Aty kaharere bo hyỹ mynakara zeka isapyha ty ibo nyny my. Utakta sihumo Deus babata, asaktsa kahyrytsa moziknaha hỹ.

<sup>8</sup>Kytsa kaharere bo yhỹ ahabyizeka izo bo zuba mysioktsokik, isapy pihikzotsabyri waha my. Asahi kaharere humo sisikpybyrētsa, siharerewabymybarētsa, isapybara nisihyrybatanahatsa, kytsa simybanikitsa, ustsas okeza humo sakparawytsa kytsa ustsasimyrawytsihiktsa asahi deusbyitsa humo hyỹ mykaranaha, kytsa nisispihikbatakanahatsa bo iwatsa asahi izo bo zuba mysioktsokik, anaeze ēsopire tazy mynakoroko anaeze motarenaha. Utakta mysioktsokikze asaktsa myokbazonaha. Sinini ykarawy bo tahawahi mynapykyryknaha hỹ – Deus niy.

*Serusarêhe ezytyk.*

<sup>9</sup> Iwaze estuba bijoikpe iknykta sete ahatsa tukta kabo izumu. Bijoikpe iknykta ioporosuk hyrity wata, taeze Deus iakyriwy ty inaharek. Atahi:

— Pany! Tapytsatatsa abo piwatawy. Hozipyrykza tsibik wata nihyrikosokda atatsa hi piakse — niy.

<sup>10</sup> Iwaze Deus hyrikoso ezekykse. Bijoikpe iknykta hara joboni tabo zikoktyhyryk. Anaeze Deus hudikhudikwy Serusarêhe ezytyk bo zikwatawy. Ihudikhudikwy bijoikpe ikny inasik, Deus ikny inasik. Ihudikhudikwy tisapyrêna inyky.

<sup>11</sup> Kytsa ihudikhudikwy bo iktsa mahaze:

— O Deus zuba imysapyrênikita. Ata zuba ihyrizikporênikita imysopykziurênikita — maha. Atahi rikazowywata. Ihudikhudikwy ikaripu karipu wa haraharezikwata tsipokzitsarêta tawata, moknywy wata kiristau wata.

<sup>12</sup> Ihudikhudikwy jokarawy joboniha tahasapynaha dosetsa hokbowytsa niaha. Bijoikpe iknyktsa dose hokbowytsa baze nisiperykynaha. Ihokbowytsa humo iwatahaha. Taparaktsa Isareu hyrytsa naro ty hokbowytsa humo ziwatahakanaha dose tyryktsa.

<sup>13</sup> Haramwe sukewy taba harakykbyihi hokbowytsa, haramwe arahawytataba harakykbyihi, hokbowytsa haramwe sukpe taba harakykbyihi hokbowytsa, haramwe itsikpyepepe taba harakykbyihi hokbowytsa iwa hokbowytsa dose ahaktsa.

<sup>14</sup> Ihudikhudikwy okarawytsa harahare buzutsa bete zizozokonaha. Haraharetsa dose tsa

ahatsa bete nizuknikinaha. Haraharetsa humo dose ahatsa naro ziwatahaka. Hozipyrykza tsibik zinymyrykynahatsa asa naro hi haraharetsa humo.

<sup>15</sup> Bijoikpe iknykta katuk nipamykysota hwi tsibik ouro suknihiy iwatawywy humo zibykyk. Atahi hudikhudikwy, ihokbowytsa, jokarawytsa iwatsa nisiwatawyky.

<sup>16</sup> Hudikhudikwy tabaktsa harape watu niaha. Bijoikpe iknykta sihudikhudikwy ziwatawyky. Atsukykyk taba Dois miu dusētos kirometero niy. Nahudikhudikwy tsakiarēna jobonita nokponiha nizukninaha niwatihi harape watu niaha.

<sup>17</sup> Jokaraha ziwatawyky. Bijo bo ziwatawy sesēta kwatero metros niy. Hwi tsibik ty ziwatawyky. Hawaze metros humo ziwatawyky bijoikpe iknykta kape niy.

<sup>18</sup> Ihudikhudikwy tisapyrēna. Ouro ty hi izoknihita, widero wata anaeze asatu tahanyinaha moknywy hyrity wata. Jokaraha saspe hi izoknihita.

<sup>19-20</sup> Haraharetsa dose sibete jokaraha nizukninaha sisapyrēnaty. Harahare humo harahareziktsa zipyryktsa sipokzitsiarētsa tsykyk niaha. Tapara harahare bete diamate usta sapira iwaze, usta akate, usta esmerarada, usta onis, usta karanēriā usta kirisorite usta beriu, usta topas, usta kasedoni, usta tyrokoise, usta ametiste, iwatsa ty haraharetsa eze harahareziktsa tsazipyrytsa sisapyrētsa ty niaha.

<sup>21</sup> Dose hokbowytsa ahatsahi peroratsa. Hokbowy wa tu perora ka atsatu tsibuzuarēna estuba zuba niy, Sihudikhudikwy ske ouro zuba.

Myoknywy wata niy.

<sup>22</sup> Deus wahoro zubata, anaeze kytsa ziknakypykyknaha eze iharere ziwabynaha, batu isty ny. Deus hi mypokzitsikitsa, atakta zikwyrēnikita tu ba hawa tohi zikzukninaha atahi anaeze napykyryk. Atakta hozipyrykza tsibik wata nihyrikosokda anaeze napykyryk niwatihi Deus tuk iwatsahi Deus wahoro zubata hana bo ja isapy zuba, abaka Deus nanabyitaba ihudikhudikwy anaeze mynapykyryk.

<sup>23</sup> Sihudikhudikwy haramwe bara byzoje kino bara Deus humo wy okoro ziky wa niukuru.

<sup>24</sup> Mybarawy ezektsa rika buruk mokurunaha Deus humo okoro waha mozik sipehatsitsa tahanamy mynazukninaha. Asaktsa Deus bo motsasokonaha.

<sup>25</sup> Sihudikhudikwy tsoiehek batu hokbo zikaha. Okoroze unata ihokbowytsa sisaparehitsa. Iunubarahukbara okoro zuba mynapykyryk.

<sup>26</sup> Mybarawy ezektsa tahanamy tisapyrēna mynazukmynaha. Asa hi:

— O Deus ikia hi zuba Deus babata. Abazubakatsa tsamysapyrēta, ba aty tohi awa suknihabyyita. Atahi nihyrikosokda hozipyrykza tsibik wata tsahyrizikporēta tsamysopykziurēta. Ahumo mykurētsa — maha.

<sup>27</sup> Sihudikhudikwy aty imysapybara ty mykara zeka ibo ba ziktsuk imysapybara tuk zeka ba ziktsuknaha. Aty imysikpybytyhaka humo my zeka ba ziktsuk, mospihikbata humo kino ba ziktsuk, ikatsahi zuba Deus sinaro papeu humo ziwatahakanahatsa zuba ihudikhudikwy bo mopupunaha. Asa hi zuba hozipyrykza tsibik wa

tuktsa. Iwa Deus tuk mynapykyryknaha asa hi ihudikhudikwy bo mynapupunaha. Iwa hỹ.

## 22

<sup>1</sup> Iwaze bijoikpe iknykta pihik kino kabo ziwatawy. Pihik tsiziurēna moknywy waha. Pihik ispitu. Pihik Deus dyhywy ikny tsiziurēna. Atakta hozipyrykza tsibik wata botu nihyrikosokda niwatihi isapy ikny tsiziurēna. Isapy Deus sapy atsatu.

<sup>2</sup> Pihik hudikhudikwy ske tazahara buruk niy. Pihik saktaba usta saktaba niwatihi hwitsa niaha. Hwitsa humo kytsa sakurētsa niyziknaha. Mytyktseheze wihara mynakymy. Mytyktseheze wihara ty dose ha nijakuk nikaranaha. Byzoje byzoje wa zuba wihara nakymyky. Okyry mybarawy ezektsa mysizororowybaka. Sakurētsa.

<sup>3</sup> Imysapybara ba zikapykyryk. Deus ituk, iwaze batu imysapybara ty mahani.

Deus dyhywy kytsa peha ykarawy eze ihudikhudikwy. Atakta hozipyrykza tsibik wata botu nihyrikosokda idyhywy niwatihi ihudikhudikwy my. Astsatu sidyhywy sisapy. Sitsumuēhĩtsitsa ipe:

— O ikia zuba tsamysapyrēta — mynakaranaha.

<sup>4</sup> Atakta nihyrikosokda hozipyrykza tsibik wata iok pinyaha inaro siokpe humo piwatahanaha.

<sup>5</sup> Ihudikhudikwy miwa ba zikyzykzo. Unata mohokda. Rika hana bo ja. Haramwe mohokda. Deus izikwyrēnikita tu ba hawa tohi zikzukninaha atahi sibo ziharamwewy ihumo okoro zikywa nizukni. Atahi mypokzitsikitsa babata,

ihudikhudikwy ezektsa ituk kytsa bo simypokzit-sikinaha, ituk kytsa mysipehakanaha tawahi my-naharapekypykyknaha.

*Sesus sukmywy.*

<sup>6</sup> Kyze bijoikpe iknykta kape niy:

– Iharere wasape niy. Takino yhỹ tsimaha zeka tisapyrēna my. Deus zikwyrēnikita tu hawa sa mynakara isohokotsitsa mysihyrinymyryky, ihyrikoso humo mysihyrinymyryky. Atahi bijoikpe iknykta sitsumuēhĩtsitsa bo zipedahik, hawa sa mynakara byi puētsik zuba mysihyrinymyryky – niy.

<sup>7</sup> Sesus hi:

– Wabyziutaha! Jokboha kyritoktok ahabo myziksizo! Asaktsa kaharere bo hyỹ mynakaranaha tsaktsa ana humo hi nispirikpokonaha sakurētsa moziknaha. Asaktsa kapapeu humo iwatahaha humo mospirikpokonaha sakurētsa mynakaranaha – niy.

<sup>8</sup> Uta Suão. Uta hi iwaby, ana hi inyba. Nan-abyi bo iktsa ikyze kaekaratsa ty puruk puruk iky. Tsizubarēna ziwabybaze bijoikpe iknykta okeryk iknaraha. Atakta tsizubarēna zikwatawyky iwatahi iokeryk puruk puruk iky. Iktsa zuba mynakara iwatahi iokeryk puruk puruk my zeka wasani my mytsaty ahabyita ikykara.

<sup>9</sup> Ata hi:

– Kaokeryk ka puruk purukbyity! Utakta awata. Katsaktsa Deus tsumuēhĩtsa mytukytsa watsa tsimaha. Asaktsa Deus sohokotsa maha myzubarētsa Deus harere papeu humo ziwataha ana humo kino hyỹ tsimykarana. Deus okeryk

zuba aekaratsa ty puruk puruk tsimy ipe: “Ikia zuba tsamysapyrēta” – niy.

<sup>10</sup> Iwaze kape niy:

– Hawa botu tsiwataha aibani atsatu mykara. Kaharere ty wasani my. Iwatahi hawa ty mynakara sihyrinomyrybyitsa bo typamykysokta!

<sup>11</sup> Aty imysapybyita mynakara zeka niwatihi zuba tynakara. Aty isapybyirikitsa mykara zeka niwatihi tynakara. Aty tsimysapyrēta mykara zeka niwatihi zuba tynakara. Aty wasani mykara zeka, wasani niwatihi tynakara – iwa niy.

<sup>12</sup> Iwaze Sesus niy:

– Wabytaha Sesus niy. Uta atsoko myziksizo katuk imysapyha ahabo mynazukmy hawa mybarawy eze zikzuruku naha zeka ihuak ty ahabo nyny my.

<sup>13</sup> Utakta koikny baktatu, suknihibyize kino utatu. Mybarawy mopykze kino kawahi mynapykyryk.

<sup>14</sup> Sakurētsaktsa sisukbarazarētsa maha. Asaktsa tahasuk botu nitsapikbanaha Deus ispe niy: “Kahudikhudikwy boktsa! Paku tsimaha. Zoihi buruk pakutyny! Iwaze ikiahatsa hwi ispita tu, wihara ty zuba tsizoknahaktsa!” – my.

<sup>15</sup> Sihudikhudikwy ape bo siakparawytsa ba zikpupunaha. Simyrawytsihiktsa simysapybyikitsa, sihyrybatatsa simybakatsitsa simyspihikbatakatsa siharere iwa mynakananaha ba zikpupunaha.

<sup>16</sup> – Uta Sesus bijoikpe iknykta katsumuēhītsa abo ipeha. Ahabo nanabyi kawahoro zuba taeze ahabo motsasoko. Utakta Dawi itsekokatsa iknykta uta byrisoik tsihizikuarēta wata.

17 Deus hyrikoso iwaze tapytsasohotatsa nikaranaha: “Pany”. Atahi piwaby zeka ata kino my: “Pany”. Ata kino iapuk zeka: “Pany” aty zeka pihik puputsa ikny ispituha mozihikik pihik ty nyny my batu ihuak. “Pany” – niy Deus hyrikoso.

*Abaka mopykyryk.*

18 Uta Suão, kapehawy papeu humo pinynahatsa bo my. Kamyiwybyita tu amy ty tisapyrēna ty zuba my. Iwatahi wabytoktotaha! Aty Deus harere papeu humo ziwataha, puētsik piwataha iwaze hawa Deus simysapybyitsa bo mykara at-satu ibo mykara. Hawa Deus takyriwy simyitsi-hikrētsa bo mykara atsatu sibo mykara – Asaktsa Deus harere puētsik piwataha.

19 Aty Deus harere papeu humo iwatahaha meky watu mozokni zeka iwaze asaktsa Deus hudikhudikwy tsiziurēna bo ba zikpupunaha. Iwatsahi asaktsa wihara humo ispitu moziknaha ba zezoknaha. – Iwa hỹ.

20 Atakta tsizubarēna nitsasoko:

– Uta atsoko myziksizo – Sesus niy.

Iwaze ipe my:

– Yhỹ tsimyziksizo hỹ – my. Iwa mypehakatsa Sesus bo my.

21 Aba nepyk Sesus pe my – O mymypokzitsikitsa ahyrytsa meky watu moziknaha myhumo tsamypokzitsiukrēta! iwatsa humo tu amypokzitsihukta – my. Iwa hỹ.



# **Deus Harere Aibaky Sesus mymyspirikpoko naha**

## **New Testament in Rikbaktsa (BR:rkb:Rikbaktsa)**

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Rikbaktsa

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 5 Apr 2025 from source files  
dated 29 Jan 2022

2f0260ea-5969-5180-9ac5-183d63a989f1